

2 SAMUEL

David tsi' yubi chamenix Saúl

1 Che' ba tsi' cha'le guerra David ti' contra amalecob, tsa' mājli i cha'an. Tsa' jijli cha'p'ejl q'uin ya' ti Siclag. ²Che' anix uxp'ejl q'uin i chamel Saúl, tsa' tili juntiquil winic tsa' ba loq'ui ba' tempabilob Saúl yic'ot i winicob. Laj tsijlem i bujc, an ts'ubejn ti' jol. Tsa' c'oti ba'an David. Tsi' pacchoco i ba. ³David tsi' c'ajtibe: ¿Baqui tilemet? che'en. Tsa' mejliyon ti puts'el ti' tojlel jini soldadojob israelo' ba, che'en. ⁴David tsi' sube: ¿Chuqui tsa' ujtí? A wocolic yom ma' subeñon, che'en. Jini winic tsi' jac'Λ: Pejtelel winicob tsa' laj puts'iyob. Chamenobix cabal winicob. Tsa'ix chamiyob ja'el Saúl yic'ot Jonatán i yalobil, che'en. ⁵David tsi' sube jini winic tsa' ba tili i tsictesaben chuqui tsa' ujtí: ¿Bajche' ma' ña'tan mi tsa'ix chami Saúl yic'ot i yalobil Jonatán? che'en.

⁶Jini winic tsi' jac'Λ: Come loquemonix ti Gilboa ba' tsac taja Saúl, ñuc ye'el i cha'an i lanza. Woli' tilel carreta tac ti' contra yic'ot winicob c'Λchalo' ba ti caballo. ⁷Saúl tsi' sutq'ui i wut ti' pat, tsi' q'ueleyon. Tsi' palyayon. “WΛ' añon”, cho'on tsac jac'Λ. ⁸Tsi' c'ajtibeyon: “¿Majquiyet?” che'en. Tsac jac'Λ: “Joñon amalecon”, cho'on. ⁹Che' jini tsi' subeyon: “Mic subeñet ti wocol t'an, yom ma' tilel tic tojlel cha'an ma' tsansaño. Cuxulon to, pero ts'ita jax yom cha'an mic chamel”, che'en. ¹⁰Jini cha'an tsac ñochta, tsac tsansa, come tsac ña'ta mach mejlix ti chan cuxtayel che' lojwemix. Jini cha'an tsac jochbe i corona am ba ti' jol yic'ot jini xotol ba am ba ti' c'Λb. WΛ'ix an. Tsac ch'ambeyet tilel, c yum, che'en.

¹¹ Che' bΛ tsi' yubi iliyi, David tsi' jet' tsili i bujc. Che'Λch tsi' meleyob ja'el pejtelel i winicob. ¹² Tsi' cha'leyob uq'uel. Tsi' wen meleyob i pusic'al. Ma'anic chuqui tsi' c'uxuyob. Ma'anic chuqui tsi' japayob c'ΛlΛl tsa' ochi ac'Λlel cha'an tsansΛbilobix ti guerra Saúl yic'ot Jonatán i yalobil Saúl, yic'ot jini israelob i cha'año' bΛ lac Yum. ¹³ David tsi' sube jini winic tsa' bΛ i tsictesΛbe jini t'an: ¿Baqui ch'oyolet? che'en. Tsi' jac'Λ: Ch'oyolon ti' lumal jini amalecob, che'en. ¹⁴ David tsi' sube: ¿Mach ba anic ma' bΛc'ñan Dios? ¿Bajche' tsa' mejli a tsansan jini winic yajcΛbil bΛ i cha'an lac Yum? che'en. ¹⁵ Jini cha'an David tsi' pΛyΛ tilel juntiquil soldado. Tsi' sube: Tsansan jini winic, che'en. Jini soldado tsi' jats'Λ jini winic, tsi' tsansa. ¹⁶ David tsi' sube: La' ajnic ti a wenta a bajñel ch'ich'el. Come tsa'ix a wΛlac subu a bΛ cha'an tsa' tsansa jini winic yajcΛbil bΛ i cha'an lac Yum.

David tsi' yuc'ta Saúl yic'ot Jonatán

¹⁷⁻¹⁸ David tsi' wen cha'le uq'uel cha'an tsa' chΛmi Saúl yic'ot Jonatán i yalobil Saúl. Tsi' yΛc'Λ mandar cha'an mi' cΛntesΛntelob pejtℓ año' bΛ ti Judá jini c'ay ts'ijbubil bΛ ti juñilel Jaser:

¹⁹ Tsa'ix jili i ñuclel jini israelob ti' joytΛlel.

Tsa'ix jiliyob jini ch'ejl bΛ winicob.

²⁰ Mach yomic mi la' tsictesan ya' ti Gat

Yic'ot ya' ti tejclum Ascalón,

Ame tijicñayic mi yubiñob jini filisteojob,

Ame mi' tse'tañonla jini winicob mach bΛ anic mi' cΛñob Dios.

²¹ P'ump'un jax jini wits tac am bΛ ti Gilboa,

Mach chΛn talix ja'al yic'ot tijil ti pejtelel q'uin.

Mach i chΛn ac' i wut jini lum ti a witsilel.

Come ya'i tsa' bib'esanti i mΛctijib jini p'ΛtΛlo' bΛ.

Tsa'ix jili i yumΛntel Saúl, wa'chocobil bΛ ti Dios.

²² Jini jalajb i cha'an bΛ Jonatán tsi' wen tsansa i contra ti pejtelel ora.

Tsi' loc'sΛbe i ch'ich'el winicob.

Jini i yespada Saúl ma'anic ba' ora tsa' to'o sujti ti' yotot.

²³ Wen p'untΛbilob Saúl yic'ot Jonatán. Wen c'uxbibilob ja'el.

Ma'anic tsi' wis t'oxoyob i bΛ c'ΛlΛl che' bΛ tsa' chΛmiyob.

Ñumen sejob ti xambal bajche' xiye'.

Ñumen p'atlob bajche' bajlum.

²⁴ X'ixicob ti Israel, uc'tanla Saúl, tsa' ba i wen ch'alayetla ti la' pislel yic'ot ti oro.

²⁵ Q'uelela bajche' tsa' jiliyob jini ch'ejl ba winicob ti guerra. P'ump'un jax tsa' chami Jonatán.

²⁶ Wen ch'ijyem jax c'pusic'al, c'uxbibil ba quermano Jonatán. Ñumen c'ux tsa' cubi a c'uxbiya bajche' i c'uxbiya x'ixicob.

²⁷ Tsa'ix jiliyob jini ch'ejl ba winicob.

Tsa'ix jisantiyob i ye'tijib ti guerra.

Che'ach ts'ijbubil ti' juñilel Jaser.

David tsa' wa'choconti ti rey cha'an Judá

2 Che' ba ujtemix pejtel iliyi, David tsi' pejca lac Yum: ¿Yom ba mic letsel majlel ti jump'ejl i tejclum Judá*? che'en. Lac Yum tsi' sube: Cucu ti letsel, che'en. David tsi' cha' c'ajti: ¿Baqui yom mic majlel? che'en. Lac Yum tsi' sube: Yom ma' majlel ti Hebrón, che'en. ²Jini cha'an David tsa' majli yic'ot jini cha'tiquil i yijñam, Ahinoam jini jezreel, yic'ot Abigail i yijñam ba Nabal ch'oyol ba ti Carmel. ³David tsi' p'aya majlel ja'el i winicob tsa' ba ajniyob yic'ot. Tsa' majliyob yic'ot i yijñamob ja'el. Ya' tsa' ajniyob ti tejclum i c'aba' Hebrón. ⁴Tsa' tiliyob winicob chumulo' ba ti Judá. Tsi' wa'chocoyob David ti rey ti' tojlel pejtel año' ba ti Judá. Tsi' tsictesabeyob David bajche' tsi' p'untayob Saúl jini ch'oyolo' ba ti Jabes ti Galaad come tsajni i mucob Saúl. ⁵Che' jini David tsi' chobeyob majlel cortesía jini año' ba ti' Jabes ti Galaad: C'ax uts'atetla ti' tojlel lac Yum, come tsa' la' pasbe Saúl ñuc ba la' c'uxbiya che' ba tsa' la' mucu. ⁶Jini cha'an wale la' i cuxbiñetla lac Yum ti' xuc'talel i pusic'al. Joñon ja'el mi caj c' melbeñetla chuqui uts'at cha'an ili ñuc ba e'tel tsa' ba la' mele. ⁷Jini cha'an wale yom p'atletla, yom ch'ejletla, come tsa'ix chami Saúl jini la' yum. Jini año' ba ti Judá tsa'ix i wa'chocoyoñob cha'an mi cochel ti rey ti' tojlelob, che'en.

I yalobil Saúl tsi' cajata i yumantel Saúl

⁸Pero Abner i yalobil Ner, ñuc ba yumal ti' tojlel i soldadojob Saúl, tsi' p'aya Isbofet i yalobil Saúl. Tsi' p'aya majlel c'lalal ti Mahanaim. ⁹Ya'i tsi' wa'choco ti rey ti' tojlel

año' bΛ ti Galaad, yic'ot Gesuri, yic'ot Jezreel, yic'ot Efraín, yic'ot Benjamín, yic'ot pejtelel jini israelob. ¹⁰Anix cha'c'al i jabilel Isboset i yalobil Saúl che' bΛ tsa' caji i cha'len yumΛ ti' tojlel israelob. Cha'p'ejl jab tsi' cha'le yumΛ. Pero pejtelel jini año' bΛ ti Judá tsi' tsajcayob David. ¹¹Ojlil i waxΛcp'ejl jab David tsi' cha'le yumΛ ya' ti Hebrón ti tojlel jini año' bΛ ti Judá.

¹²Abner i yalobil Ner tsa' loq'ui ti Mahanaim yic'ot pejtelel jini soldadojob i cha'an Isboset (i yalobil Saúl). Tsa' c'otiyob ti Gabaón. ¹³Joab (i yalobil bΛ Sarvia) yic'ot jini soldadojob i cha'an David tsa' loq'uiyob ti Hebrón. Tsa' c'oti i tajob i bΛ ya' ti' tojel jini ts'ajquibil bΛ ja' ti Gabaón. I winicob David tsa' wa'leyob ti junwejl. I contrajob tsa' wa'leyob ti yambΛ junwejl. ¹⁴Abner tsi' sube Joab: Mi uts'at ma' wubin, subeñob tilel jini ch'iton winicob cha'an mi' cha'leñob leto quic'ot lojon, che'en. Joab tsi' jac'Λ: Yom cu. La' majlicob, che'en. ¹⁵Che' jini tsa' yajcantiyob lajchantiquil i winicob Isboset, benjamiñob, yic'ot lajchantiquil i winicob David. ¹⁶Ti jujuntiquil tsi' chucu i contra ti' tsutsel i jol. Tsi' sΛl jec'be i ch'il'at ti espada. Che'i tsa' chamiyob ti pejtelelob. Jini cha'an tsa' otsanti i c'aba' jini lum ti Gabaón ba' tsa' yajliyob, Helcat Hazurim. JiñΛch i yajñib espada jay bΛ i yej. ¹⁷Wen bΛbΛq'uen jax ili querra ti jini q'uin. Abner yic'ot jini israelob ma'anic tsa' mΛjliyob i cha'an, come i soldadojob David tsi' jisayob.

¹⁸Ya' añob uxtiquil i yalobilob Sarvia: Joab yic'ot Abisai yic'ot Asael. Ili Asael wen ajñel yujil xΛmbal che' bajche' chijmay. ¹⁹Asael tsa' caji i yajñesan Abner. Ma'anic tsi' wis tats'Λ i bΛ, mi ti' ts'ejic mi ti' ñojic. ²⁰Tsi' sutq'ui i bΛ Abner. Tsi' yΛΛ: ¿Mach ba jatetic Asael? che'en Abner. Jini tsi' jac'Λ: Joñon cu, che'en. ²¹Abner tsi' sube: Yom ma' tats' a bΛ ti a ñoj o mi ti a ts'ej. Yom ma' chuc yambΛ winic. Chilben pejtelel chuqui an i cha'an, che'en. Pero Asael ma'anic tsi' jac'Λ i tats' i bΛ. ²²Abner tsi' cha' sube Asael ti cha'yajlel: Yom ma' tats' a bΛ tic tojlel. ¿Yom ba mic tsansañet? ¿Bajche' mi caj c cha' pejcan a wΛscun Joab? che'en. ²³Che' jini Abner tsi' sutq'ui i c'Λb ti' pat cha'an mi' sΛl jec' Asael che' ma'anic tsi' tats'Λ i bΛ. Tsa' sΛl ñumi ti' ch'i'lat c'ΛΛ ti junwejl i pat. Ya' tsa' yajli. Ya' tsa' wa'leyob pejtelel jini xñumelob woli bΛ i tilelob. Ya' jach tsa' cΛleyob ba' ñolol i bac'tal Asael.

²⁴Pero Joab yic'ot Abisai tsa' caji i sajcañob Abner. Wolix ti ic'an che' ba tsa' c'otiyob ya' ti bujtal i c'aba' Amma am ba ti' tojlel Gía, ti' bijlel Gabaón. ²⁵Tsi' tempayob i ba jini benjamiñob ti' tojlel Abner cha'an mi' melob ti junmojt jach i soldadojob. Ya' tsa' ajniyob ti bujtal i c'aba' Amma. ²⁶Abner tsi' sube Joab: ¿Jala to ba mi caj i chlan jilelob winicob ti espada? ¿Mach ba a wujilic woli jach lac p'ojlesan wocol? Che' ti' yujtibal cabalix lac ch'ijiyemlel. ¿Baqui to ora mi caj a subeñob a soldadojob cha'an mi cly i yajñesañob i pi'llob? che'en. ²⁷Joab tsi' jac'la: Tsa'ic a wan subu che' bajche' wale ma'anic tsa' tejchi guerra sajmal ti sac'ajel. Che'ic jini lu' sujtemonix lojon ti cotot. Melel che' bajche' cuxul Dios, che'en. ²⁸Jini cha'an Joab tsi' wusu jini xulub. Ti pejtelel winicob tsi' clyayob leto. Ma'anix tsi' chlan cha'leyob guerra yic'ot israelob.

²⁹Abner yic'ot pejtelel i pi'llob ti jump'ejl ac'lalel tsa' ñumiyob majlel ya' ti Arabá. Tsa' c'axiyob ti Jordán ja'. Tsa' ñumiyob ti pejtelel Bitrón c'lalal tsa' c'otiyob ti Mahanaim. ³⁰Joab tsi' much'q'ui pejtél jini winicob che' ba tsi' clyal i yajñesan Abner. Woli jach ti falta Asael yic'ot bolonlujuntiquil (19) i winicob David. ³¹Pero i winicob David tsa'ix i malbeyob i winicob Benjamín yic'ot i winicob Abner. Tsi' tsansayob waxaclujunc'al (360) winicob. ³²Tsi' q'uecheyob majlel i bac'tal Asael. Tsi' mucuyob ya' ti Belén ba' mucbil i tat. Jump'ejl ac'lalel tsi' cha'le xalmbal Joab yic'ot i winicob. Wolix i sac'an pañimil che' ba tsa' c'otiyob ti Hebrón.

3 Cabal guerra tsa' ujti ti' tojlel i pi'llob Saúl yic'ot i pi'llob David, pero chlan p'atlal to tsa' ajni David che' ba tsa' caji i c'unte c'un'an i pi'llob Saúl.

I yalobilob David tsa' ba i yilayob pañimil ti Hebrón

(1 Cr. 3.1-4)

²Jini ascuñaal ba i yalobil David jiñach Amnón (i yalobil Ahinoam ch'oyol ba ti Jezreel). ³I cha'ticlel ba i yalobil jiñach Quileab (i yalobil Abigail tsa' ba c'ale ti meba' che' ba tsa' chami Nabal ch'oyol ba ti Carmel). I yuxticlel i yalobil jiñach Absalón (i yalobil Maaca, i yalobil Talmai, jini rey ti Gesur). ⁴I chanticlel i yalobil jiñach Adonías (i yalobil Haguit). I jo'ticlel i yalobil jiñach Sefatías (i yalobil Abital). ⁵I wacticlel i yalobil

jiñlach Itream (i yalobil Egla i yijñam David). Pejtelel iliyi tsi' yilayob pañimil ti Hebrón.

Abner tsi' wa'choco i t'an ti' tojlel David

⁶Che' woliyob to ti guerra i pi'lob Saúl ti' contra David, Abner tsa' caji ñuc'an ti' tojlel i pi'lob Saúl. ⁷An juntiquil x'i'xic i c'aba' Rizpa (i yalobil Aja). Jiñlach i yixic Saúl. Isboset tsi' sube Abner: ¿Chucoch tsa' c'oti a pejcan i yixic c tat? che'en. ⁸Abner tsa' wen mich'a cha'an jini t'an tsa' ba i yala Isboset. Abner tsi' yala: ¿Ts'i'on ba cha'an mic lemben i c'ab Judá? C'ala wale tsa'ix c wen colta i pi'lob Saúl. Ma'anic tsa cac'ayetla ti' c'ab David. Wale wolix a pac'on ti mulil yic'ot jini x'i'xic. ⁹Mux caj a toj yic'ot Dios. Mi caj j coltan David cha'an mi' ts'actiyel i t'an lac Yum tsa' ba i sube David. ¹⁰Come lac Yum tsi' yal'ue David i yumantel Saúl. Mi caj i yochel ti' wenta. David mi caj i cha'len yumal ti Israel yic'ot ti Judá c'alal ti Dan c'alal ti Beerseba. Che' tsi' yala Abner. ¹¹Jini Isboset ma'anic bajche' tsa' mejli i jac'ben i t'an Abner, come woli' wen bac'ñan.

¹²Che' jini Abner tsi' choco majlel winicob i suben David: ¿Majqui i cha'an pejtelel ili lum? Yom mi lac tem lac t'an. Mi caj c cha'len wera cha'an mi' yochelob ti a wenta pejtelel israelob, che'en. ¹³David tsi' sube: Uts'at, mux c laje' c t'an quic'otet. Pero junchajp jach mic wan c'ajtibeñet. Mach ma' to'ol tilel a q'uelon jinto ma' ñaxan pay tilel Mical i yalobil Saúl, che'en. ¹⁴David tsi' choco majlel winicob ba'an Isboset (i yalobil Saúl) cha'an mi' suben: Cha' chocbeñon tilel quijñam Mical, come jiñlach tsa' ba c taja ti' q'uexol jo'c'al i pachalel filisteojob. Jiñlach i tojol c'ajtibil ba cha'an a tat, che'en. ¹⁵Che' jini Isboset tsi' chocbe majlel. Tsi' chili loq'uel jini x'i'xic ti' tojlel i ñoxi'al i c'aba' Paltiel (i yalobil Lais). ¹⁶I ñoxi'al Mical tsa' caji i tsac'len majlel che' ba woli ti xambal majlel. Woli ti uq'uel majlel c'alal tsa' c'oti ti Bahurim. Abner tsi' sube: Cucux ti sujtet, che'en. Che' jini tsa' sujti jini winic.

¹⁷Abner tsi' cha'le t'an yic'ot jini xñoxob año' ba ti' lumal Israel. Tsi' yala: Anix ora la' wom la' wotsan David ti rey ti la' tojlel. ¹⁸Cha'lenix la mecu, come lac Yum tsa'ix i yala: “Mi caj j c'an David cha'an mic loc'san Israel ti' c'ab filisteojob yic'ot ti' c'ab pejtelel i contrajob”, che'en. ¹⁹Che' ja'el Abner tsi' pejca

jini año' ba ti Benjamín. Tsa' majli Abner ti Hebrón ba'an David cha'an mi' suben pejtelel chuqui tac yomob i mel jini israelob yic'ot jini benjamiñob. ²⁰Che' ba tsa' c'oti ba'an David yic'ot junc'al winicob, David tsi' chajpabeyob i bal i ñac' Abner yic'ot pejtelel i winicob tsa' ba i pi'leyob tilel. ²¹Abner tsi' sube David: Mux c majlel c pejcan pejtelel israelob cha'an mi' temob i t'an, cha'an mi' yotsañetob ti rey ti' tojlelob. Che' jini mi mejlel a subeñob pejtelel chuqui a wom, che'en. Che' jini tsi' clyayob i ba David yic'ot Abner. Tsa' majli Abner ti' ñach'tlalel i pusic'al.

Joab tsi' tsansa Abner

²²Awilan wolix i sujtelob i soldadojob David yic'ot Joab. Woli' ch'amob tilel cabal chublaañal tsa' ba i tajayob ti guerra. Pero mach ya'ix an Abner yic'ot David ya' ti Hebrón, come majlemix ti' ñach'tlalel i pusic'al. ²³Che' ba tsa' c'oti Joab yic'ot pejtelel jini soldadojob tsajniyo' ba yic'ot ti guerra, tsa' subenti cha'an tsi' pejca jini rey Abner i yalobil Ner, pero cha' sujtemix ti' ñach'tilel i pusic'al. ²⁴Joab tsa' majli ba'an rey. Tsa' caji i ya'len: ¿Chuqui tsa' mele? Come wale tsa'ix tili Abner i pejcañet. ¿Chucoch tsa' wac'la ti sujtel? ²⁵Wen cambil a cha'an Abner (i yalobil Ner). Tsa' jach tili i lotiñet cha'an mi' can baqui ma' loq'uel, yic'ot baqui ma' wochel, yic'ot pejtelel chuqui ma' mel, che'en.

²⁶Che' ba loq'uemix Joab ba'an David, tsi' cha' choco winicob cha'an mi' palyob Abner. Tsi' tajayob ba'an jini pozo i c'aba' Sira. Tsi' cha' palyob, pero mach wis yujilic David chuqui woli' yujtel. ²⁷Che' ba tsa' cha' c'oti Abner ya' ti Hebrón, Joab tsi' mucu palya Abner cha'an mi' bajñel pejcan ba'an colem tranca. Ya'i tsi' quextabe i mul cha'an tsi' tsansabe i yeran, Asael. Tsi' sal jeq'ue ti' yojlil i ch'il'at. Che' jini tsa' chami Abner. ²⁸Che' ba tsi' yubi David chuqui tsa' ujti, tsi' yala: Mic sub ti' tojlel Dios, mach c mulic, mach i mulic c pi'lob ja'el cha'an tsa' tsansanti Abner (i yalobil Ner). ²⁹La' ajnic ti' wenta Joab yic'ot pejtelel año' ba ti' yotot. Ti pejtelel ora la' ajnic c'amajel ti' yotot, yic'ot leco tac ba i tsoy, yic'ot tiquin tac ba i yoc. Uts'at mi' laj chamelob ti espada yic'ot ti wi'ñal jini año' ba ti' yotot Joab, che'en. ³⁰Abner tsi' tsansa Asael ti guerra ya' ti Gabaón. Jini cha'an Joab yic'ot Abisai i yeran tsi' tsansayob Abner.

³¹Pero David tsi' sube Joab yic'ot pejtelel jini año' ba ti tejclum: Yom mi la' tsil la' bujc. Yom mi la' mel la' pusic'al cha'an tsa' chami Abner, che'en. David tsi' cha'le xambal majlel ti' pat jini ch'ujlelal. ³²Che' jini tsi' q'uecheyob majlel i bac'tal Abner c'alal ti Hebrón cha'an mi' mucob. Jini rey c'am tsi' cha'le uq'uel yic'ot pejtelel jini año' ba ti tejclum. ³³Ch'ijiyem jax tsi' cha'le t'an. Tsi' yala: ¿Che' ba yom mi' chamel Abner che' bajche' mi' chamel juntiquil mach ba anix i c'ajñibal? ³⁴Ma'anic ba' ora tsa' c'ajchi a c'ab yic'ot a woc. Pero tsa' tsansantiyet che' bajche' xñujp'el ti' p'atalel jontol ba winicob, che'en. ³⁵Pejtelel i pi'lob ti tejclum tsi' wera subeyob David cha'an mi' c'ux i waj che' q'uiñil to. Pero David tsi' yala: La' i coltañon lac Yum. Ma'anic chuqui mi caj j c'ux jinto mi' bajlel q'uin, che'en. ³⁶Che' ba tsi' yubibeyob i t'an David pejtelel winicob x'ixicob, uts'at tsi' q'ueleyob David yic'ot pejtelel chuqui tac tsi' mele. ³⁷Ti pejtelel jini tejclum tac ti pejtelel Israel tsi' ch'ambeyob isujm mach i mulic jini rey che' ba tsa' chami Abner (i yalobil Ner). ³⁸Jini rey tsi' sube x'e'telob i cha'an: ¿Mach ba la' wujilic? Jiñach ñuc ba yumal ti' lumal Israel jini tsa' ba chami. ³⁹C'uñonix wale, anquese yajcabilon cha'an mi cochel ti yumal, come ili winicob (i yalobilo' ba Sarvia) wen tsatsob i pusic'al tic tojlel. Lac Yum la' i yalq'ueñob i toj i mul jini mu' ba i cha'leñob jontolil. Che' tsi' yala David.

Tsa' tsansanti Isboset

4 Che' ba tsi' yubi Isboset (i yalobil Saúl) chamenix Abner, tsa' caji ti baq'uen. Pejtelel jini israelob tsi' cha'leyob baq'uen. ²An i cha'an Isboset cha'tiquil i yumob soldadojob. Juntiquil jiñach Baana. Yamba jiñach Recab i yalobilobach Rimón chumul ba ti Beerot. Ochem Beerot ti' wenta Benjamín. ³Jini ch'oyolo' ba ti Beerot tsa' ñumiyob majlel ti Gitaim. C'alal wale ya' añob che' bajche' xjula'ob, come mach mero i lumalic.

⁴An ja'el juntiquil i yalobil Jonatán mach ba wenic i yoc. An jax to jo'p'ejl i jabilel che' ba tsi' yubiyob ti Jezreel chameñobix Saúl yic'ot Jonatán. Ti jim ba ora jini xmec' alal tsi' meq'ue majlel ti puts'el. Che' ba woli ti ajñel majlel, tsi' yasa jini alal. Tsa' asiya i yoc. I c'aba' jini alal jiñach Mefiboset.

⁵Recab yic'ot Baana (i yalobilob Rimón ch'oyol ba ti Beerot) tsa' ochiyob ya' ti' yotot Isboset ya' ba' ñolol ti' wayib woli' c'aj i yo che' ti xinq'uiñil. ⁶⁻⁷Tsa' ochiyob ti mal cha'an mi' q'uechob loq'uel trigo tsi' poj meleyob. Pero ti cha'ticlel tsi' lowoyob Isboset ti' ñac'. Tsi' set' t'objeyob i bic'. Tsi' wox ch'ambeyob majlel i jol. Tsa' puts'iyob majlel. Tsi' tsajcayob majlel jini Arabá c'AlAl tsa' c'otiyob ti Hebrón. ⁸Tsi' yal'ueyob David i jol Isboset. Tsi' subeyob: Wa'ix an i jol Isboset (i yalobil Saúl) tsa' ba i contrajiyet, yom ba i tsansañet. Lac Yum tsa'ix i q'uexlabe i mul Saúl yic'ot i p'olbal ti a tojlel, che'ob. ⁹Pero David tsi' jac'be Recab yic'ot Baana (i yalobilo' ba Rimón chumul ba ti Beerot): Lac Yum tsi' coltayon ti pejtelel wocol. ¿Mach ba anic mi la' bacñan jini cuxul ba Dios? ¹⁰Che' ba tsa' tili winic i subeñon ch'amenix Saúl, tsi' lon ña'ta mi caj calq'uen i majtan che' ba tsa' tili i subeñon. Pero tsac chucu, tsa cac'la ti tsansantel ti Siclag cha'an i q'uexol i t'an tsa' ba i subeyon. ¹¹Ñumen mi caj calq'ueñob i toj i mul xjontolilob mu' ba i tsansañob toj ba winic ti' yotot che' an ti' wayib, che'en. ¿Mach ba yomic mi cac' ti la' wenta cha'an mi la' tojben i ch'ich'el? ¿Mach ba yomic mic junyajlel jisañetla ila ti pañimil? che'en. ¹²Che' jini David tsi' yal'la i t'an. Jini x'e'telob i cha'an tsi' tsansayob. Tsi' set' t'objeyob loq'uel i c'Ab yic'ot i yoc. Ya' tsi' jich' ac'ayob ti' tojel jini ts'ajquibil ba ja' ya' ti Hebrón. Tsi' ch'ambeyob i jol Isboset. Tsa' majli i mucob ya' ba' tsa' mujqui i bac'tal Abner.

Tsa' wa'choconti David ti' rey israelob

(1 Cr. 11. 1-3)

5 Tsa' c'oti i pejcañob David ya' ti Hebrón pejtelel israelob ti mojt ti mojt. Tsi' yal'ayob: Wa' añon lojon. Junsujm jach c bac'tal lojon yic'ot a bac'tal. Junsujm jach c baquel lojon yic'ot a baquel. ²Come ti yamba ora che' woli to i cha'len yumal Saúl tic tojlel lojon, jatet tsa' majliyet ti guerra yic'ot soldadojob. Tsa' cha' sujtiyob a wic'ot. Mach jinic jach, pero lac Yum tsi' subeyet ja'el: “Yom ma' cantabeñon c tejclum Israel. Mux caj a cha'len ñuc ba yumal ti' tojlelob”, che'en lac Yum. Che' tsi' yal'ayob israelob. ³Che' jini tsa' c'otiyob ti Hebrón pejtelel jini xñoxob. Jini rey David tsi' laja i t'an yic'otob ti' wut lac Yum. Tsi' wa'chocoyob David ti rey ti' tojlel

israelob. ⁴Anix lujump'ejl i cha'c'al i jabilel David che' ba tsa' caji i tech i yumantel. Cha'c'al jab tsi' cha'le i yumantel. ⁵Ojlil i waxacp'ejl jab tsi' cha'le i yumantel ti Hebrón ti' tojlel año' ba ti Judá. Uxlujump'ejl i cha'c'al (33) jab tsi' cha'le i yumantel ti Jerusalén ti' tojlel pejtél Israel yic'ot Judá.

David tsi' ch'ama Sion

(1Cr. 11.4-9)

⁶Tsa' majli ti guerra jini rey David yic'ot i winicob ti contra Jerusalén ba' chumulob jini jebuseojob. Come jini jebuseojob tsi' subeyob David: Mach mejlic a wochel ilayi, come jini xpots' yic'ot mach ba weñobic i yoc mi caj i choquetob loq'uel, che'ob. Tsi' lon ña'tayob mach mejlic ti ochel David. ⁷⁻⁸Pero David tsi' subeyob i soldadojob: Cucula ti letsel ti' bej yoc ja' c'alal mi la' c'otel ti tejclum. Yom mi la' tsansan jini xpots' ba yic'ot mach ba weñobic i yoc. Muc' abi i choquetla loq'uel, che'en. Che' jini David tsi' ch'ama jini wen melbil ba tejclum i c'aba' Sion. Jiñach i tejclum David. Jini cha'an mi la cal: Jini xpots'ob yic'ot mach ba weñobic i yoc mi' majlelob i cha'an, cho'onla. ⁹Jini cha'an David tsa' caji ti chumtal ti jini wen melbil ba tejclum. Tsi' yotsabe i c'aba' I Tejclum David. Tsi' ts'ajqui wen tac ba otot c'alal ti Milo c'alal ti' yojlil tejclum. ¹⁰Che' jini tsa' utsi p'ojli i p'atlel David. Jini lac Yum Dios, jini Yumal ti Panchan yic'ot ti Pañimil, an yic'ot David.

Hiram tsi' choco majlel x'ac' jun ba'an David

(1 Cr. 14.1-2)

¹¹Hiram i rey jini año' ba ti Tiro, tsi' choco majlel x'ac' juñob ba'an David. Tsi' choco majlel ch'ujte', yic'ot xjuc' te'ob yujilo' ba i melol otot, yic'ot yujilo' ba i ts'ajquintel otot, cha'an mi' melbeñob i yotot David. ¹²Jini cha'an David tsi' ña'ta isujm lac Yum tsi' wa'choco ti rey. Tsi' ñuq'uesabe i yumantel come c'ux tsi' yubi Israel, jini tejclum yajcabil ba i cha'an.

I yalobilob David tsa' ba i yilayob pañimil ti Jerusalén

(1 Cr. 3.5-9; 14. 3-7)

¹³Che' ba tsa' loq'ui David ti Hebrón cha'an mi' chumtal ti Jerusalén, tsa' to i cha' palya yan tac ba i yijñam David. Tsi' yila pañimil ch'iton ba yic'ot xch'oc ba i yalobilob. ¹⁴Jiñach

i c'aba' i yalobilob tsa' bΛ i yilayob pañimil ti Jerusalén:
Samúa, Sobab, Natán, Salomón, ¹⁵Ibhar, Elisúa, Nefeg, Jaffá,
¹⁶Elisama, Eliada yic'ot Elifelet.

David tsi' jisa jini filisteojob

(1 Cr. 14.8-17)

¹⁷Che' bΛ tsi' yubiyob filisteojob wa'chocobilix David ti rey ti' tojlel israelob, tsa' caji i contrajinob David yic'ot pejtelel i soldadojob. Che' bΛ tsi' yubi David, ti ora tsa' majli ba' wen ts'ajquibil. ¹⁸Tsa' tiliyob jini filisteojob. Tsa' pam jijliyob ti joctΛ i c'aba' Refaim. ¹⁹David tsi' pejca lac Yum: ¿Yom ba mic majlel c cha'len guerra ti' contra filisteojob? ¿Mu ba caj a wΛc'ob tij c'Λb? che'en. Lac Yum tsi' sube David: Cucu come ti isujm mi caj c'Λc' jini filisteojob ti a c'Λb, che'en. ²⁰Che' jini tsa' majli David ba'an Baal Perazim. Ya'i tsi' mΛΛΛ David. Tsi' yΛΛ: Lac Yum tsa'ix i jisΛbeyon j contrajob ti' tojel c wut che' bajche' but'ja' mu' bΛ i pajmel loq'uel ti' ti' pa', che'en. Jini cha'an tsa' otsΛbenti i c'aba' Baal Perazim. ²¹Ya' tsi' cΛyayob i dioste'ob. David yic'ot i soldadojob tsi' laj puluyob.

²²Pero tsa' cha' tiliyob ti guerra jini filisteojob. Tsa' cha' ochiyob ti joctΛ i c'aba' Refaim. ²³David tsi' cha' c'ajtibe lac Yum. Lac Yum tsi' yΛΛ: Mach yomic ma' letsel majlel. Yom mi la' joy mΛctañoob ti' pat ya' ti' tojel jini bÁlsama te'. ²⁴Che' ma' wubin t'an che' bajche' xΛmbal ti' pam jini bÁlsama te', ti jim bΛ ora yom ma' cha'len wersa, come che' jini loq'uemonix ti' tojel a wut cha'an mic jisan jini filisteojob. Che' tsi' yΛΛ lac Yum. ²⁵Che'Λch tsi' mele David che' bajche' tsi' sube lac Yum. Tsi' laj jisa jini filisteojob c'ΛΛΛ ti Geba, c'ΛΛΛ ba' mi la cochel ti Gezer.

David tsi' lon ñopo i ch'Λm majlel jini Arca ya' ti Jerusalén

(1 Cr. 13. 5-14)

6 David tsi' cha' much'qui pejtel jini yajcΛbilo' bΛ ti' tojlel israelob, lujuntiquil i cha'c'al mil (30,000) winicob. ²Tsi' teche xΛmbal yic'ot pejtelel jini yajcΛbilo' bΛ winicob ti Israel. Tsa' majliyob ti Baala ti Judá cha'an mi' ch'Λmob tilel jini Arca i cha'an lac Yum. JiñΛch Arca* ba' mi' tsictiyel i c'aba' lac Yum, i Yum Panchan yic'ot Pañimil, buchul bΛ

ti' yum^Δntel ti' tojlel jini querubiñob. ³Tsi' c'acchocoyob jini Arca ti' pam jump'ejl tsiji' bΔ carreta. Tsi' ch'ΔmΔyob loq'uuel ti' yotot Abinadab, ya' ti' bujtΔl. Uza yic'ot Ahío i yalobilob Abinadab woli' toj'esañob majlel jini carreta ba' c'ΔcΔl jini Arca i cha'an Dios. ⁴Che' bΔ tsi' cΔyΔyob i yotot Abinadab am bΔ ti' bujtΔl, Ahío tsa' majli ti' ñaxan ti' tojel jini Arca. ⁵David yic'ot pejtelel israelob woliyob ti' son ti' tojlel lac Yum cha'an mi' ch'ujutesañob yic'ot c'ay, yic'ot arpa, yic'ot salterio, yic'ot pandero, yic'ot flauta, yic'ot címbalo.

⁶Pero che' bΔ tsa' c'otiyob ba' mi' jats'ob trigo ti' lum Nacón, jini wacax tsi' p'ojqui i yoc. Colel i yajlel. Jini cha'an Uza tsi' sΔts'Δ i c'Ab ya' ba'an i yArca lac Yum. Tsats tsi' chucu. ⁷Che' jini tsa' bΔc' c'oti i mich'lel lac Yum ti' tojlel Uza. Ti' ora jach tsa' ch'ami ya' ti' t'ejl jini Arca. ⁸Che' jini tsa' mich'a David che' bΔ tsi' tsΔnsa Uza lac Yum. Jini cha'an tsa' otsΔbenti i c'aba' jini ajñibΔl Pérezuza. Che'Δch i c'aba' c'ΔlΔl wΔle. ⁹Ti' jim bΔ q'uin David tsa' caji i wen bΔc'ñan lac Yum. Tsi' yΔlΔ: ¿Bajche' mi' mejlel i tilel tic tojlel jini Arca i cha'an lac Yum? che'en. ¹⁰Mach chΔn yomix i ch'Δm tilel jini Arca ya' ti' Jerusalén. Jini cha'an tsi' xoyoyob i bijlel. Tsa' majliyob ti' yotot Obed Edom jini geteo. ¹¹Ya' tsa' cΔle jini Arca i cha'an lac Yum ti' yotot Obed Edom jini geteo uxp'ejl uw. Lac Yum tsi' wen colta Obed Edom yic'ot pejtelel año' bΔ ti' yotot.

David tsi' ch'ΔmΔ majlel jini Arca ti' Jerusalén

(1 Cr. 15.1—16.6)

¹²An majqui tsi' sube David: Lac Yum woli' wen coltan jini año' bΔ ti' yotot Obed Edom yic'ot pejtelel chuqui tac an i cha'an, cha'an ti' caj jini Arca i cha'an Dios, che'en. Jini cha'an tsa' majli David ti' tijicñayel i pusic'al cha'an mi' loc'san ti' yotot Obed Edom, cha'an mi' cha' ch'Δm tilel ti' Jerusalén. ¹³Che' an jax to wΔcxajc tsi' yΔc'Δyob i yoc jini woli' bΔ i q'uechob majlel jini Arca, tsa' wa'leyob ti' bij. David tsa' caj i tsΔnsΔben i majtan lac Yum, juncojt tat wacax yic'ot tat tiñΔme!. ¹⁴David tsi' chΔn cha'le tijp'ejl ti' tijicñayel i pusic'al ti' tojlel lac Yum, Δpbil i cha'an jump'ejl bujcΔl lino bΔ pisil. ¹⁵Tijicñayob i pusic'al tsi' cha' ch'ΔmΔyob sujtel jini Arca i cha'an lac Yum. Tsi' wusuyob majlel trompeta tac, tsi' cha'leyob c'ay.

¹⁶Che' ba woli' c'otel ti Jerusalén jini Arca i cha'an lac Yum, ya' wa'al Mical i yixic'al Saúl ti ventana. Tsi' q'uele che' woli ti ñuqui tijp'el David ti' tojlel lac Yum. Mical i yijñam David tsi' mucu ts'a'le i ñoxi'al ti' pusic'al. ¹⁷Che' jini tsi' yotsayob jini Arca i cha'an lac Yum ya' ti' yojlil i mal Tabernáculo. David tsi' wa'choco. Tsi' pulbe tsansabil ba i majtan* lac Yum. ¹⁸Che' ba ujtemix i yalq'uen pulbil ba i majtan lac Yum, David tsi' yalq'ue i yutslel i t'an pejtelel winicob ti' c'aba' lac Yum. ¹⁹Tsa' caji i pucbeñob waj yic'ot we'elal, yic'ot tiquin ba ts'usub jini israelob. Che' ujtemix ti pejtelel, jini winicob x'ixicob tsa' sujtiyob majlel ti' yotot ti jujuntiquilob.

²⁰Tsa' sujti majlel David ti' yotot cha'an mi' yac' i yutslel i t'an. Pero Mical tsa' tili i taj David. Tsi' yala: ¿I t'ojol ba chuqui tsa' mele sajmal? ¿Che' ba yom mi' mel i rey israelob? Che' ba tsa' jocho a pislel ti' wut jini xch'ocob, tsa' pas a ba bajche' tonto ba winic, che'en. ²¹David tsi' jac'be Mical: Che'ach tsac challe ti' tojlel lac Yum tsa' ba i yajcayon che' cuxul to a tat yic'ot pejtelel i pi'lob. Tsi' yalq'ueyon c yumantel ti' tojlel Israel i tejclum lac Yum. Jini cha'an yom tijicña mic pas c ba ti' tojlel lac Yum. ²²Tijicñayon che' mi cac' ti ñuc lac Yum anquese ts'a'lelilon. Mach ñuquic mij q'uel c ba, pero jini xch'ocob woli ba a taj ti a t'an mi caj i q'ueloñob ti ñuc, che'en. ²³Mical i yixic'al Saúl ma'anic i yalobil. Jochol tsa' cale c'alal tsa' chami.

Jini xuc'ul ba t'an tsa' ba i mele Dios yic'ot David

(1 Cr. 17:1-27)

7 Tsa' c'axi ti chumtal jini rey David ti ñuc ba i yotot. Lac Yum tsi' c'unte' lajmesa guerra ti' tojlel i contrajob ti jujunwejl. ²Jini rey tsi' sube jini x'alt'an Natán: Q'uele bajche' añoñ wale come wa' chumulon ti colem otot melbil ba ti ch'ujte', pero jini Arca i cha'an lac Yum an jach ti juntsajl melbil ba ti pisil, che'en. ³Natán tsi' sube jini rey: Mele pejtel chuqui a wom, come lac Yum woli' coltañet, che'en.

⁴Awilan ti jini jach ba ac'alal tsa' tili i t'an lac Yum ba'an Natán. Tsi' sube: ⁵Cucu suben c winic David: "Jiñach i t'an a Yum: ¿Mu' ba caj a melbeñon cotot cha'an c chumlib? ⁶Come ti isujm ma'anic ba' ora tsa' wis ajniyon ti otot c'alal che' ba tsac loc'sa jini israelob ti Egipto. Ya jach ti pisil ba otot tsac

cha'le xambal quic'ot c cha'año' bλ. ⁷Che' bλ tsac pi'leyob majlel baqui jach tsac sube jini israelob, ¿tsa' ba j c'ajtibeyob cotot jini año' bλ i ye'tel ti' tojlel israelob? Ma'anic tsac sube mi juntiquilic cha'an mi' melbeñon cotot ti ch'ujte'". ⁸Jini cha'an suben c winic David: "Che'λch woli' yλ i Yum Panchan yic'ot Pañimil: Joñon tsac loc'sayet ti a we'tel ya' ba' tsa' cλnta tiñame'. Tsa cotsayet ti' yum israelob cha'an ma' cλntan c tejclum. ⁹Tsa'ix ajniyon quic'otet baqui jach tsa' ñumiyet. Tsa'ix c jisa pejtelel winicob tsa' bλ tiliyob ti a contra. Mi caj cac' ti cλjñel a c'aba' ti' tojlel ñuc bλ winicob ti pañimil. ¹⁰Mux caj cλq'ueño' i lum c winicob ba' mi' cajelob ti chumtλλ. Ya'i mi caj i yajñelob ti pejtelel q'uin. Ma'anic majqui mi caj i chan loc'sañob. Jini xjontolilob mach mejlix i chan tic'laño' che' bajche' ti ñaxan ¹¹che' bλ tsac wa'choco juezob ti' tojlel c tejclum israel c'λλλ wale. Mi caj cλq'uet ti chumtλλ ti ñach'λλ ti' tojlel a contrajob. Lac Yum wolix i subeñet mi caj i xuc'chocoñet yic'ot a p'olbal ti a we'tel ti' tojlel israelob. ¹²Che' ts'actayemix a jabilel, che' ma' majlel a c'aj a wo ba'an a tatob, che' jini mi caj c tech juntiquil a walobil cha'an mi' mel jini e'tel ti a q'uexol. Muq'ui'x caj cλq'uen i yumantel. ¹³Jini a walobil mi caj i wa'chocobeñon cotot tij c'aba'. Joñon mi caj cλq'uen i yumantel ti pejtelel ora. ¹⁴Mi caj i tatiño'ni. Mi caj i yochel ti calobil. Mi tsa' caji i ñusabeñon c t'an, mi caj cλq'uen i tsico' pusic'al yic'ot asiyal che' bajche' mi' melob winicob ti pañimil che' mi' toj'esaño' i yalobilob. ¹⁵Pero ma'anic mi caj j cλy j c'uxbin a walobil che' bajche' tsaj cλyλ j c'uxbin Saúl che' bλ tsac loc'sa ti' ye'tel. ¹⁶Mi caj cλq'ueño' i ye'tel a polbal cha'an mi' cha'leño' yumantel tic tojlel ti pejtelel ora. Che'λch mi caj c melbeñet cha'an xuc'ul ma' wajñel ti a buchlib yic'ot a p'olbal ti pejtelel ora". Che'λch yom ma' suben David, che'en lac Yum. ¹⁷Natán tsi' sube David pejtelel chuqui tac tsi' yubi yic'ot chuqui tac tsi' q'uele. ¹⁸Tsa' ochi David ti' tojlel lac Yum. Tsi' yλλ: C Yum Dios, wen uts'atax jini mu' bλ caj a melbeñon quic'ot calobilob. Anquese ma'anic c bajñel ñucler lojon, tsa' pasbeyon i yutslel a pusic'al c'λλλ wale. ¹⁹Come tsa' yajcayon che' maxto anic j c'λjñibal. Tsa' wa'chocoyon ti rey. Pero wale ñumen cabλ mi caj a pasbeñon i yutslel a pusic'al ti' tojlel c p'olbalob ti pejtelel ora. C Yum Dios, mach che'ic mi' melob winicob

bajche' jini. ²⁰ ¿Chuqui to yom mic subeñet? A winicon, c Yum Dios. ²¹ Cujil wolix a mel pejtet jini ñuc tac bΛ cha'an mi' ts'actiyel a t'an, cha'an che'ach yom a pusic'al. Tsa'ix a wΛn subeyon. ²² Come wen ñuquet, c Yum Dios. Ma'anic yambΛ Dios che' bajche' jatet. Jatet jach Dioset. ²³ Ma'anic yambΛ tejclum c'uxbibil bΛ bajche' Israel wΛ' ti pañimil. Come tsa' loc'sa ti wocol cha'an mi' ñochtañet. Tsa' pΛyΛyob cha'an ma' wΛc' ti ñuc i c'aba'. Tsa' pΛsbeyob i yejtal tac a p'ΛtΛlel cha'an mi' bΛc'ñañetob. Tsa'ix a mañΛyob loq'uel ti' lumal Egipto. Tsa'ix a choco jubel yan tac bΛ tejclum yic'ot i diosob. ²⁴ Isujm jatet c Yum tsa' wa'choco jini israelob a cha'año' bΛ cha'an mi' yochelob ti a tejclum ti pejtelel ora. Jatet c Yum tsa' wotsa a bΛ ti' Dios.

²⁵ Jini cha'an wale, c Yum Dios, ts'actesan a t'an ti' tojlel c p'olbal ti pejtelel ora che' bajche' tsa' wΛΛ. ²⁶ La' q'uejlic ti ñuc a c'aba' ti pejtelel ora. La' i subob winicob: “Jini YumΛ am bΛ pejtelel i p'ΛtΛlel jiñach i Dios israelob”, che'ob che' wa'chocobilob c p'olbalob tic buchlib ti a tojlel. ²⁷ Come i Yumet Panchan yic'ot Pañimil, i Dioset Israel. Tsa' subeyon mi caj a coltañon quic'ot c p'olbalob cha'an mic cha'len lojon yumΛntel. Jini cha'an ñuquix c pusic'al wolic pejcañet ti oración. ²⁸ C Yum Dios, isujm Dioset ti pejtelel ora. Isujm pejtelel a t'an. Tsa'ix a wΛn subeyon chuqui mi caj a melbeñon ti uts'at. ²⁹ Jini cha'an a wocolic aq'ueño' i yutslel a pusic'al jini año' bΛ ti cotot cha'an mic chΛn ajñel lojon ti a tojlel ti pejtelel ora. Come tsa'ix a wΛc'Λ a t'an, c Yum Dios. Tsa'ix a pΛsbeyon lojon i yutslel a pusic'al. Jini cha'an tijicñayon lojon ti pejtelel ora, che'en David.

Tsa' mañli i cha'an David ti' tojlel i contrajob

(1 Cr. 18.1-13)

8 David tsi' c'unte' jisa jini filisteojob. Tsa' wen mañli i cha'an. Tsi' ch'ΛmΛ Metegama, jini colem tejclum am bΛ ti' wenta filisteojob. ² Tsi' jisa Moab. Tsi' subeyob ñoltΛl ti lum. Che' tsololob, tsi' p'isiyob ti lazo. Ti' cha'p'isles tsa' tsansantiyob. Jump'is tsa' coli. Ma'anic tsa' tsansantiyob, pero tsa' ochiyob ti' winic David. Tsa' caji i yΛc'ob i tojoñel ti jujump'ejl jab. ³ David tsi' jisa ja'el Hadadezer i yalobil Rehob, jini rey ti Soba, che' bΛ tsa' caji i ch'ejl'esan i bΛ ya' ti colem ja'

Eufrates. ⁴David tsi' chilbeyob ch'ambajc' yic'ot jo'c'al (1,700) winicob c'ach'alo' ba ti caballo, yic'ot junc'al mil (20,000) winicob woliyo' ba ti x'ambal ti' yoc. David tsi' tsepbe i chijil i ya' jini caballo tac woli ba i tujc'an majlel jini carreta. Tsa' jax i c'ay'a jo'c'al cha'an mi' tujc'an majlel carreta. ⁵Jini siriajob año' ba ti Damasco tsa' tili i coltañob Hadadezer jini rey ti Soba. David tsi' jisayob ja'el che' bajche' cha'p'ejl i cha'c'al mil (22,000) winicob. ⁶Che' jini David tsi' wa'choco xcantayajob ya' ti Damasco ti' tojlel jini siriajob cha'an mi' yotsañob ti' winic David, cha'an mi' y'aq'ueñob i tojoñel. Awilan lac Yum tsi' wen colta David baqui jach tsa' ñumi. ⁷David tsi' ch'ama jini ma'ctijib melbil ba ti oro tsa' ba i c'añayob i winicob Hadadezer. Tsi' ch'ama tilel ti Jerusalén, ⁸yic'ot ja'el cabal' bronce tsa' ba i chilbeyob jini año' ba ti Beta yic'ot ti Berotai, i tejclum Hadadezer.

⁹Tsi' yubi Toi, jini rey am ba ti Hamat, laj jisabilob i soldadojob Hadadezer ti' wenta David. ¹⁰Jini cha'an Toi tsi' choco majlel i yalobil Joram ba'an jini rey David cha'an mi' y'aq'uen cortesía ti' ñach'talel i pusic'al yic'ot i yutslel i t'an, cha'an tsa' majli i cha'an ti guerra ti' contra Hadadezer. Come ti jim ba ora i contrajob i ba Toi yic'ot Hadadezer. Che' jini Joram tsi' ch'ama majlel oro, yic'ot plata, yic'ot bronce cha'an mi' y'aq'uen David. ¹¹⁻¹²David tsi' y'aq'ue lac Yum pejtelel chuqui tac tsi' taja ti guerra, yic'ot jini oro yic'ot tsucu taqu'in tsa' ba i ch'ama ti' tojlel jini siriajob, yic'ot jini moabob, yic'ot jini amoñob, yic'ot jini filisteojob, yic'ot jini amalecob, yic'ot ti' tojlel jini Hadadezer, i yalobil Rehob jini rey am ba ti Soba. ¹³Che'i tsi' wen taja i ñuclel David. Tsi' jisa waxaclujump'ejl mil (18,000) ch'oyolo' ba ti Edom ya' ti joctal i c'aba' Ats'am. ¹⁴Tsi' wa'choco xcantayajob ya' ti Edom ti' joyt'alel jini tejclum tac. Che' jini tsa' ochiyob jini edomob ti' winic David. Lac Yum tsi' wen colta David baqui jach tsa' ñumi.

X'e'telob i cha'an David

(2 S. 20.23-26; 1 Cr. 18.14-17)

¹⁵David tsi' cha'le yumal ti' tojlel pejtel Israel. Tsi' cha'le toj ba meloñel. ¹⁶Joab (i yalobil Sarvia) tsa' ochi ti yumal ti' tojlel soldadojob. Josafat (i yalobil Ahilud) tsa' ochi ti secretario. ¹⁷Sadoc (i yalobil Ahitob) yic'ot Ahimelec (i

yalobil Abiatar) tsa' ochiyob ti motomaj*. Seraías tsa' ochi ti sts'ijbujel. ¹⁸Benaía (i yalobil Joiada) tsa' ochi ti' yum jini cereteojob yic'ot jini peleteojob. I yalobilob David tsa' ochiyob ti xcantaya ti' wenta Benaía.

David tsi' pasbe i yutslel i pusic'al Mefiboset

9 David tsi' yala: ¿Anto ba majqui tsa' cale ti' yotot Saúl cha'an mi calq'uen i yutslel c pusic'al ti' quexol Jonatán? che'en. ²An juntiquil xq'uel e'tel ti' yotot Saúl i c'aba' Siba. Tsa' pajyi tilel ba'an David. Jini rey tsi' c'ajtibe: ¿Jatet ba Siba? che'en. Tsi' jac'be: Joñon cu, che'en. ³Jini rey tsi' c'ajtibe: ¿Cuxul to ba juntiquil i pi'Al Saúl cha'an mic pasben i yutslel c pusic'al che' bajche' Dios woli' pasbeñon? che'en. Siba tsi' jac'be: Cuxul cu juntiquil i yalobil Jonatán mach ba wenic i yoc, che'en. ⁴Jini rey tsi' c'ajtibe: ¿Baqui an? che'en. Siba tsi' jac'be: Ya'an ti' yotot Maquir (i yalobil Amiel am ba ti Lodebar), che'en. ⁵Jini cha'an jini rey David tsi' choco ti payol ti' yotot Maquir. ⁶Tsa' c'oti Mefiboset (i yalobil Jonatán i yalobil ba Saúl) ba'an David. Tsi' pacchoco i ba, pero David tsi' sube: Mefiboset, che'en. Tsi' jac'la: Wla' añon a winicon, che'en. ⁷David tsi' sube: Mach a cha'len baq'uen, come ti isujm mi caj c pasbeñet i yutslel c pusic'al cha'an tsaj c'uxbi a tat, Jonatán. Mi caj c cha' sutq'uibeñet pejtelel i lumal a tatuch Saúl. Mi caj a cha'len we'el quic'ot tic mesa ti pejtelel ora, che'en. ⁸Mefiboset tsi' cha' c'uchchoco i ba. Tsi' yala: Cabal jax i yutslel a pusic'al tic tojlel anquese ma'anic j c'ajñibal. Lajalon bajche' chamen ba ts'i', pero wola' p'untañon, che'en.

⁹David tsi' paya tilel Siba, i winic Saúl. Tsi' sube: Q'uele i yalobil a yum. Tsa'ix calq'ue pejtelel chuqui tac tsa' cale am ba ti' wenta Saúl ti yamba ora. ¹⁰Jatet yic'ot a walobilob yic'ot a winicob mi caj la' melben i ye'tel ti' chol. Mi caj la' mac'lan i yalobilob a yum ti pejtelel ora, pero Mefiboset mi caj i cha'len we'el quic'ot ti pejtelel ora, che'en. Ti jim ba ora an jo'lujuntiquil i yalobilob Siba yic'ot junc'al i winicob. ¹¹Siba tsi' sube: Ts'acal mi cajel c mel che' bajche' tsa' wala, che'en. Che' jini Mefiboset tsi' c'uxu waj ya' ti' mesa David che' bajche' i yalobilob rey. ¹²An juntiquil ch'iton ba i yalobil Mefiboset i c'aba' Micaía. Siba yic'ot pejtelel i pi'Alob año' ba ti' yotot tsa' ochiyob ti' winic Mefiboset. ¹³Ya' tsa' chumle Mefiboset ti

Jerusalén, come tsi' c'uxu waj ti' mesa jini rey. Mach wenic i yoc ti cha'ts'ijtlel.

Tsa' jisantiyob jini amoñob yic'ot siriajob

(1 Cr. 19.1-19)

10 Che' ba tsa' chami i rey jini amoñob, tsa' caji ti yumantel i yalobil Nahas i c'aba' Hanún. ²David tsi' yala: Mi caj calq'uen i yutslel c' pusic'al Hanún, come wen uts'at bajche' tsi' cha'le i tat quic'ot, che'en. Jini cha'an David tsi' choco majlel jini x'e'telob i cha'an, cha'an mi' ñuq'uesabeñob i pusic'al Hanún cha'an tsa' chami i tat. Pero che' ba tsa' c'otiyob jini x'e'telob i cha'an David ba'an jini amoñob, ³awilan jini ñuc taco' ba i ye'tel ti' tojlel amoñob tsa' caji i subeñob jini rey Hanún: ¿Mu' ba a lon ña'tan woli' choc tilel winicob David cha'an c'ux tsi' yubi a tat? ¿Cha'an ba mi' ñuq'uesabeñet a pusic'al tsi' chocoyob tilel? ¿Mach ba' tsa'ic i chocoyob tilel ti tsajiya cha'an mi' ña'tan bajche' añaonla ila ti tejclum cha'an mi' jisañonla? che'ob. ⁴Jini cha'an Hanún tsi' chucu i winicob David. Tsi' quech jujchibeyob junwejl i tsucti'. Ya' jaxal tsi' tsepbeyob i pislel ti' chañelal i ya'. Che' jini tsi' chocoyob sujtel. ⁵Che' ba tsi' yubi David, tsi' choco majlel winicob cha'an mi' tajob ti bij ba' ñajta wa'alob ti' ti' tejclum, come mach yomobic ochel cha'an quisin. Tsi' subeyob c'aytal ti Jericó jinto che' cha' pasemobix i tsucti'. Che' jini uts'at mi' cha' sujtelob.

⁶Che' ba tsi' q'ueleyob jini amoñob leco jax i melbal ti' tojlel David, tsa' majli i p'ayob tilel junc'al mil winicob siriajob año' ba ti Betrehob yic'ot ti Soba. Tsi' p'ayob tilel ja'el i winicob jini rey ti Maaca, jump'ejl mil winicob yic'ot lajch'amp'ejl mil winicob ch'oyolo' ba ti Istob. ⁷⁻⁸Che' ba tsi' yubi David, tsi' choco majlel Joab yic'ot pejtelel jini soldadojob. Jini amoñob tsa' caji i chajpañob i ba cha'an guerra ya' ti' ti' i tejclum. Jini siriajob choyolo' ba ti Soba, yic'ot ti Rehob, yic'ot ti Istob, yic'ot ti Maaca tsi' chajpayob i ba ya' ti' pat tejclum. ⁹Che' ba tsi' q'uele Joab woli' contrañob ti guerra ti cha'wejlel, tsi' choco majlel jini soldadojob ñumen chajp'abilo' ba cha'an guerra cha'an mi' contrañob jini siriajob. Tsa' majli Joab yic'otob. ¹⁰I colojbal soldadojob tsa' ajq'uiyob ti' wenta Abisai i yeran Joab. Abisai tsi' tsoloyob cha'an mi' majlel i tajob jini

amoñob. ¹¹Joab tsi' yλλλ: Mi cabal i p'λtλlel jini siriajob tic tojlel, mi tsa' caji' mλlob, yom ma' tilel a coltañon, pero mi tsa' caji' mλlob jini amoñob ti a tojlel, mi caj j coltañet. ¹²Yom ch'ejlet. La' lac cha'len wersa cha'an mi laj coltan lac pi'λlob yic'ot i lumal lac Yum. La' i mel lac Yum pejtelel chuqui uts'at ti' wut. Che' tsi' yλλλ Joab. ¹³Che' jini tsa' majli Joab yic'ot pejtelel i winicob cha'an mi' cha'len guerra ti' contra jini siriajob. Tsi' chucuyob i puts'el. ¹⁴Che' bλ tsi' q'ueleyob jini amoñob bajche' tsa' puts'iyob jini siriajob, tsi' bλc' chucuyob i puts'el ja'el ti' tojlel Abisai. Tsi' tajayob i coltλntel ti mal tejclum. Che' jini Joab tsa' sujti ti Jerusalén.

¹⁵⁻¹⁶Jini siriajob che' bλ tsi' q'ueleyob ma'anic tsa' majli i cha'an, tsa' cha' caji i tempañob i bλ. Jini cha'an Hadadezer tsi' pλyλ tilel jini año' bλ ti junwejl colem ja' i c'aba' Eufrates. Jini soldadojob tsa' c'otiyob ti Helam. I yum jini soldadojob jiñach Sobac, jini wa'chocobil bλ i cha'an Hadadezer. ¹⁷Che' bλ tsi' yubi David, tsi' laj tempa pejtelel jini israelob. Tsa' c'axiyob ya' ti Jordán. Tsa' c'otiyob ya' ti Helam. Jini siriajob tsa' caji i chajpañob i bλ cha'an guerra ti' contra David.

¹⁸Pero tsa' cha' puts'iyob ti' tojlel israelob. David tsi' tsλnsa jo'lujunc'al i cha'bajc' (700) mu' bλ i ñijcañob carreta tac, yic'ot cha'c'al mil (40,000) winicob c'λchλlo' bλ ti caballo. Tsi' tsλnsa ja'el Sobac jini ñuc bλ yumλl cha'an soldadojob.

¹⁹Yaño' bλ woli bλ i coltañob Hadadezer, che' bλ tsi' q'ueleyob woli' majlel i cha'an Israel, tsi' c'ajtibeyob David ti wocol t'an cha'an mi' lajmel guerra. Jini cha'an tsa' ochiyob ti' winicob. Jini siriajob ma'anix tsi' chλn coltayob amoñob c'λlλl wale.

David tsa' yajli ti mulil

11 Che' ti' tejchibal jabil che' i tilel mi' loq'uelob ti guerra jini reyob, David tsi' choco majlel soldadojob i cha'an. Tsa' majliyob ja'el i yumob soldadojob ti' wenta Joab, jiñach ñumen ñuc bλ. Tsa' majli i jisañob jini amoñob. Tsi' joy mλctayob ya' ti Rabá, pero ya' jach tsa' c'ale David ti Jerusalén. ²Awilan ti jump'ejl q'uin che' wolix i yic'an, David tsa' loq'ui ti xλmbal ti q'uuiyil bλ i jol i yotot. Tsi' ñajti q'uele' juntiquil x'ixic woli bλ ti ts'λmel, wen i t'ojol jax. ³David tsi' c'ajti majqui jini x'ixic. Tsa' subenti jiñach Betsabé i yixic'al Eliam, i yijñam Urías jini heteo. ⁴David tsi' choco ti pλyol. Jini

x'ixic tsa' tili ba'an David. Ya' tsa' wayi yic'ot ti' yotot. Che' ba' ujtemix i pi'leñon i ba', tsa' cha' sujti ti' yotot. ⁵Tsa' caji i cantan i yalobil jini x'ixic. Tsi' choco ti subentel David: Wolix j cantan calobil, che'en.

⁶David tsi' chocbe mandar Joab: Chocbeñon tilel Urías jini heteo, che'en. Jini cha'an Joab tsi' choco sujtel Urías ba'an David. ⁷Che' c'otemix Urías, David tsi' c'ajtibe bajche' yilal Joab, yic'ot bajche' yilal pejtelel jini winicob ti guerra. ⁸David tsi' sube Urías: Cucux ti sujtel ti a wotot. Cucu ti ts'amel, che'en. Che' woli to ti loq'uel Urías ti' yotot jini rey, tsa' chocbenti majlel i majtan. ⁹Pero Urías ya' jach tsa' caji ti wayel ya' ti' corredor jini rey yic'ot pejtelel jini x'e'telob i cha'an rey. Ma'anic tsa' jubi majlel ti' yotot. ¹⁰An majqui tsi' sube David: Ma'anic tsajni ti' yotot Urías, che'en. Che' jini David tsi' c'ajtibe Urías: ¿Mach ba' ñajtic tsa' tiliyet? ¿Chucoch ma'anic tsa' sujtiyet ti a wotot? che'en. ¹¹Urías tsi' jac'be David: Isujm ma'anic tsajniyon ti cotot come jini Arca, yic'ot israelob, yic'ot c pi'lob ti Judá, ma'añobic ti' yotot, yic'ot c yum Joab, yic'ot pejtelel x'e'telob i cha'an. Ya' añob ti guerra wale. ¿Uts'at ba' mic majlel ti we'el ti cotot? ¿Yom ba' mic sujtel ba'an quijñam? che'en. Anquese che'ach ma' subeñon mach mejlic c jac', che'en. ¹²David tsi' sube Urías: Yom to ma' c'aytal ti cotot wale. Ije'al to yom ma' sujtel, che'en. Jini cha'an ya'to tsa' cale Urías ti Jerusalén ti jim ba' q'uin. ¹³David tsi' p'aya ti' yotot cha'an mi' cha'llen we'el yic'ot. Tsi' yaq'uesa Urías. Che' iq'uix pañimil tsa' cha' c'axi ti wayel yic'ot i winicob i yum ya' ti corredor, pero ma'anic tsa' majli ti' yotot.

David tsi' yac'la ti tsansantel Urías

¹⁴Che' ti yije'alal David tsi' choco majlel jump'ejl carta ba'an Joab ti' c'ab Urías. ¹⁵Ya' ti carta tsi' sube cha'an mi' choc majlel Urías ba' wen babaq'uen jini guerra. Tsi' sube ja'el ñajt jach yom mi' c'aytal Urías ti' bajñelil cha'an mi' tsansantel. ¹⁶Jini cha'an Joab tsi' yac'la ba' wen babaq'uen jini guerra. Tsi' choco majlel ti ñaxan jini Urías. ¹⁷Ti jim ba' ora tsa' loq'uiyob ti jini tejclum winicob cha'an mi' contrajñob Joab ti guerra. Awilan tsa'ix chamiyob juntiquil cha'tiquil i winicob David yic'ot ja'el Urías jini heteo. ¹⁸Joab tsi' choco majlel suboñel ba'an David cha'an mi' suben pejtelel chuqui tsa' ujti ti'

tojlelob ya' ti guerra. ¹⁹Joab tsi' sube jini suboñel che' bajche' iliyi: Che' mi' yujtel a laj tsictesan ti' tojlel jini rey pejtelel chuqui tsa' ujti, ²⁰mi tsa' caji ti mich' jini rey, mi tsi' subeyet: “¿Chucoch cʌʌx tsa' majliyetla cʌʌʌl ti' ti' tejclum? ¿Mach ba la' wujilic muq'uix i juletla jini año' bʌ ti ts'ajc? ²¹¿Majqui tsi' tsansa jini Abimelec (i yalobil Jerobaal)? ¿Mach ba tsa'ic i tsansa juntiquil x'ixic tsa' bʌ i choco jubel ña'atun? Che' jini tsa' chʌmi ya' ti Tebes. ¿Chucoch tsa' la' cʌʌx lac'tesa la' bʌ ya' ti' tojlelob?” Mi che'en David, che' jini yom ma' suben chʌmenix ja'el Urías jini heteo. Che' tsi' yʌʌʌ Joab.

²²Tsa' majli jini suboñel cha'an mi' tsictesʌben David pejtelel chuqui tsi' yʌʌʌ Joab. ²³Jini suboñel tsi' sube jini rey che' bajche' iliyi: Tsa' tiliyob j contra lojon cʌʌʌl ti' ti' tejclum. ²⁴Jini mu' bʌ i c'ñaob jalʌjb tsi' tsansayob a winicob. Tsa'ix chʌmiyob cha'tiquil uxtiquil a winicob, yic'ot a winic Urías, che'en. ²⁵David tsi' sube jini winic: Suben Joab cha'an mach yomic mi' mel i pusic'al cha'an ili tsa' bʌ ujti. Come jini espada yujilʌch jisaya. An i tajol mi' jisan juntiquil ti lac ts'ej. An i tajol mi' jisan yambʌ ti lac ñoj. Jini cha'an cha'lenla wersa yic'ot pejtelel a winicob cha'an mi la' jisan jini tejclum. Suben uts'at mi caj i majlel i cha'an, che'en David.

²⁶Che' bʌ tsi' ña'ta i yijñam Urías che' chʌmenix i ñoxi'al wen ch'iijiyem tsa' caji i yubin. ²⁷Che' bʌ ujtemix i yorajlel uc'taya, David tsi' choco ti pʌyol cha'an mi' tilel ti' yotot. Tsa' ochi ti' yijñam. Tsi' yʌq'ue David i yalobil, pero lac Yum tsi' q'uele mach uts'atic chuqui tsi' mele David.

Natán tsi' tsictesʌbe i mul David

12 Lac Yum tsi' choco majlel Natán ba'an David. Che' bʌ tsa' c'oti ya' ti' yotot, tsa' caji i suben jini t'an: An cha'tiquil winic ti jump'ejl tejclum. Juntiquil an cabʌl i chubʌ'an, yambʌ wen p'ump'un jax. ²Jini wen chumul bʌ an cabʌl i tiñame' yic'ot i wacax. ³Pero jini p'ump'un bʌ an jach juncojt i yʌʌ ña'al tiñame' tsa' bʌ i mañʌ, tsa' bʌ i cosa. Ya'ʌch tsa' coli ti' yotot yic'ot i yalobilob. Ya'ʌch tsi' c'uxu i bʌl i ñac' ti' ch'ejew. Tsi' japʌ ti taza. Tsi' meq'ue. Tsi' c'uxbi che' bajche' mi laj c'uxbin la calobil. ⁴Tsa' tili winic ti jula' ti' yotot jini wen chumul bʌ winic. Pero i yum jini otot mach yomic i tsansan i tiñame' yic'ot i wacax cha'an mi' yʌq'uen i c'ux

i jula'. Tsa' majli i chucben i yalΛ ña' tiñame' jini p'ump'un ba cha'an mi' yaq'uen i c'ux, che'en Natán. ⁵David tsi' wen mich'le jini winic tsa' ba i ch'ΛmΛ jini tiñame'. Tsi' sube Natán: Ti isujm mic subeñet come cuxul lac Yum, an i mul jini winic tsa' ba i mele che' bajche' jini. Yom mi' tsansantel, che'en. ⁶Yom mi' q'uextaben ti chancojt tiñame' jini tsa' ba i ch'ΛmΛ, come ma'anic tsi' p'unta, che'en.

⁷Che' jini Natán tsi' sube David: Jiñach a mul come che'ach tsa' mele jatet. Lac Yum i Dios israelob tsi' yaΛa: “Joñon tsac wa'chocoyet ti' rey israelob. Tsaj coltayet loq'uel ti' c'ab Saúl. ⁸Tsa caq'ueyet a wotot. Tsa'ix cotsa ti a wenta i yijñamob Saúl tsa' ba a yuma. Tsa'ix caq'ueyet a we'tel ti rey ti Israel yic'ot ti Judá. Mi mach jasalic iliyi, mic ñumen aq'ueñet pejtelel chuqui tac yom. ⁹¿Chucoch ma'anic tsa' p'isi ti wenta i t'an a Yum? ¿Chucoch tsa' mele chuqui leco ti' tojlel? Come tsa' wac'Λ ti chamel Urías jini heteo. Tsa' choco majlel ti tsansantel ti' tojlel jini amoñob. Tsa' paybe i yijñam. ¹⁰Jini cha'an mi caj i chan ujtél guerra ti a tojlel ti pejtelel ora, come tsa' ts'a'leyon. Tsa' paybe i yijñam Urías”, che'en lac Yum. ¹¹Jiñach i t'an lac Yum: “Awilan muq'uix cajel i p'ojlel a wocol ti a wotot. Mi caj c chilbeñet a wijñamob cha'an mic cha' aq'ueñob a pi'lob mu' ba caj i payob. Mi caj i ñoltalob ti q'uiñil ti pañimil. ¹²Jixcu jatet, tsa' mele iliyi ti mucul, pero joñon mi caj c pas ti jamal ti' wut pejtelel israelob”. Che' tsi' yaΛa lac Yum, che'en Natán. ¹³David tsi' sube: Tsa'ix c cha'le mulil ti' contra lac Yum, che'en. Natán tsi' sube: Lac Yum tsa'ix i ñusabeyet a mul. Ma'anic ma' cajel ti chamel. ¹⁴Pero cha'an tsa' wac'Λ ti ts'a'lentel lac Yum ti' tojlel i contrajob, muq'uix i chamel a walobil tsa' ba i yila pañimil, che'en.

¹⁵Tsa' sujti majlel Natán ti' yotot. Lac Yum tsi' yaq'ue i wocol i yalobil David tsa' ba i yaq'ue jini x'ixic i yijñam ba Urías. ¹⁶David tsi' pejca lac Yum ti oración cha'an mi' lajmel jini ch'iton. Ma'anic chuqui tsi' wis c'uxu David. C'ΛlΛ tsa' ñumi ac'alel, ya' jach ñolol ti to'o lum. ¹⁷Tsa' majliyob jini xñoxob año' ba ti' yotot cha'an mi' techob ch'ojyel David ya' ti lum, pero ma'anic tsi' jac'beyob. Ma'anic tsi' tem c'uxu waj yic'otob. ¹⁸Ti' wucp'ejlel q'uín tsa' chami jini ch'iton. Jini x'e'telob i cha'an David woliyob ti baq'uen. Mach yomobic i tsictesaben jini rey cha'an chamenix i yalobil. Tsi' subeyob i ba: Che'

cuxul to jini alal, mach yomic i jac'beñonla lac t'an. Che' mi lac suben chamenix i yalobil, ¿mach ba muquic i ñumen ac' i ba ti wocol jini rey? che'ob. ¹⁹Pero David tsi' q'uele woliyobix ti t'an jini x'e'telob i cha'an. Che' jini tsi' ña'ta chamenix jini alal. Jini cha'an David tsi' c'ajtibeyob: ¿Tsa'ix ba chami alal? che'en. Tsi' jac'ayob: Tsa'ix cu, che'ob. ²⁰Tsa' tejchi ch'ojyel David. Tsi' cha'le ts'amel. Tsi' boño i ba. Tsi' q'uexta i pislel. Ti wi'il tsa' ochi ti' yotot lac Yum cha'an mi' ch'ujutesan. Tsa' cha' tili ti' yotot. Tsi' c'ajti i bal i ñac' cha'an mi' c'ux. ²¹Awilan tsi' c'ajtibeyob jini x'e'telob i cha'an: ¿Bajche' isujm woli a mel che' bajche' jini? che'ob, come che' woli ti ajcan jini alal, tsa' wen cha'le uq'uel. Ma'anic chuqui tsa' c'uxu. Pero wale che' chamenix, tsa'ix tejchiyet ch'ojyel cha'an ma' c'ux i bal a ñac', che'ob. ²²David tsi' jac'la: Isujm tsa'ix c wen mele c pusic'al che' woli to ti ajcan jini ch'iton, come tsac ña'ta tic'al mu' to i p'untañon lac Yum cha'an mi' cha' aq'uen i c'oc'lel jini alal. ²³Pero wale tsa'ix chami. ¿Chuqui to i ye'tel mic chan cha'len ch'ajb? ¿Mejl ba c cha' cuxtesan? Joñon mi caj c majlel baqui majlem, pero mach chan mejlix ti tilel tic tojlel, che'en David. ²⁴Che' jini David tsa' caji i ñuq'uesaben i pusic'al Betsabé i yijñam. Tsi' pi'le. Tsa' caji' cantan i yalobil. Tsi' yac'la ti pañimil i yalobil. Tsi' yotsabe i c'aba' Salomón. Awilan lac Yum tsi' wen c'uxbi jini ch'iton. ²⁵Lac Yum tsi' cha' choco majlel jini x'alt'an Natán cha'an mi' yotsaben i c'aba' Jedidías, cha'an c'ux tsi' yubi lac Yum.

David tsi' chucu Rabá

(1 Cr. 20.1-3)

²⁶Ti jim ba ora Joab tsi' cha'le guerra ti' contra jini amoñob. Tsi' ch'ama jini colem tejclum i c'aba' Rabá ba' chumul i rey. ²⁷Tsi' choco majlel suboñel ba'an David. Tsi' sube: Tsa'ix c ch'ama jini ts'amal ba ja' am ba ti Rabá. ²⁸Yom ma' tempan pejtelel jini soldadojob ya' to ba añob a wic'ot cha'an ma' tilel ti' contra Rabá cha'an ma' ch'am. Mach yomic mic ch'am joñon ame muquic i q'ueloñob ti ñuc, che'en. ²⁹Che' jini David tsi' laj tempa jini winicob. Tsi' p'ayayob majlel ti' contra Rabá. Tsi' chan cha'leyob guerra jinto tsa' majli i cha'an David. Tsi' ch'ama ti' wenta jini tejclum. ³⁰David tsi' loc'sabe i corona jini rey. An i yalel che' bajche' jump'ejl talento oro. An ja'el

paɫ'bil ba ujal ti corona wen i t'ojol ba, letsem tac ba i tojol. Tsa'ix aq'uenti i c'ac David. Ti jini q'uin an cabal chuqui tsi' loc'o David ya' ti tejclum. ³¹Tsi' choco loq'uel jini chumulo' ba ti tejclum. Tsa' caji i c'añob ti e'tel ti pic lum yic'ot ti p'el te' yic'ot fierro ba e'tijibal tac. Tsi' yaq'ueyob ja'el i ye'tel cha'an mi' pulob ladrillo. Che'ach tsi' melbeyob jini amoñob ti pejtelel i tejclum. Che' jini David tsa' cha' sujti ti Jerusalén yic'ot pejtelel i winicob.

Amnón yic'ot Tamar

13 An xch'oc ba i yalobil David i c'aba' Tamar. Jiñlach i yijts'in Absalón, wen i t'ojol jax. An yamba i yalobil David i c'aba' Amnón. Jini tsa' caji i mulaben i yijts'in Absalón. ²Amnón tsi' wen mula Tamar. Colelix i taj c'am'ajel cha'an tsi' chan pensari. Quisintic tsi' yubi cha'an mi' pejcan, come wen xch'oc to. ³An juntiquil i yamigo Amnón, i c'aba' Jonadab (i yalobil Simea, i yascun David). Awilan wen p'ip'atax i pusic'al jini Jonadab. ⁴Jonadab tsi' sube: ¿Chucoch ti q'uin ti q'uin woli a yaj'an? Subeñon, che'en. Amnón tsi' jac'be: Isujm wolic wen mel c' pusic'al cha'an wolic wen mulan Tamar i yijts'in Absalón jini queran, che'en. ⁵Jonadab tsi' sube: Cucu ti ñolta i a walyib, cha'an ma' pas a ba che' bajche' c'amet. Che' mi' tilel i q'uelet a tat, suben bajche' iliyi: “La' poj tilic Tamar cha'an mi' yaq'ueñon chuqui mij c'ux wa' ba' ñololon tic walyib”, che'en. ⁶Che' jini tsa' ñole Amnón. Wen c'am tsa' caji i mel i ba. Che' ba tsa' tili i q'uel jini rey, Amnón tsa' caji i suben i tat: Awocolic poj choco tilel Tamar, cha'an mi' melbeñon ts'ita' i bal c' ñac cha'an mij c'ux, che'en.

⁷Che' ba tsa' c'oti David ti' yotot, tsi' choco majlel Tamar cha'an mi' melben i waj. ⁸Che' ba tsa' c'oti Tamar ti' yotot Amnón ya' ba' ñolol i yascun, tsa' caji i melben pan. Tsi' xac'la ti' tojel i wut Amnón. ⁹Che' mejlemix jini pan tsi' ch'ambe majlel ya' ba ñolol, pero Amnón ma'anic tsi' jac'la i c'ux. Tsa' jach caji i subeñob loq'uel pejtelel x'e'telob. Jini cha'an tsa' loq'uiyob. ¹⁰Amnón tsa' caji i suben Tamar: Ch'amla tilel jini pan ilayi tic walyib cha'an ma' wotsabeñon ti quej, che'en. Tamar tsi' ch'ambe majlel pan ya' ba' ñolol. ¹¹Ba' ora tsa' c'oti i yaq'uen ya' baqui ñolol, Amnón tsi' chucu Tamar. Tsi' sube: La' ñoleconla, che'en. ¹²Jini xch'oc tsi' jac'la: Mach comic. Leco

jax muq'uet ti t'an, come mach i t'ojolic mi' yujtel ti' tojlel israelob bajche' iliyi. Mach a mel chuqui quisintic jax. ¹³Come ¿majqui to mi caj i p̄ayon mi tsa' lac pi'le lac ba? che'en. Jixcu jatet ¿a wom ba pejcantel ti tonto ti Israel? Jini cha'an mic subeñet ñaxan pejcan lac tat. Mi cal mux i jac'beñet a t'an, che'en. ¹⁴Pero Amnón ma'anix tsi' ch̄an jac'be i t'an. Tsi' wersa tuje'a ochel ti' w̄ayib. Che' ba tsi' ñolchoco tsa' caji ti ñoltal yic'ot.

¹⁵Amnón tsa' caji i wen mich'len Tamar. Ts'ita' tsi' c'uxbi ti ñaxan, pero che' ba tsa' ujt i pi'len, tsa' caji i wen ts'a'len. Jini cha'an Amnón tsa' caji' suben: Cucux ti a wotot, che'en. ¹⁶Jini xch'oc tsi' cha'le uq'uel: ¿Chucoch ma' chocon loq'uel? ¿Mach ba ñumen anic a mul che' ma' chocon loq'uel che' bajche' ti ñaxan che' ba tsa' pejcayon? che'en. Utsijax tsa' caji ti mich' Amnón. ¹⁷Amnón tsi' p̄aya tilel jini x'e'tel i cha'an. Tsi' sube: Choco loq'uel ili x'ixic ti jumpat. Yom ma' wen ñup' jini otot. ¹⁸Jini ch'iton tsi' choco loq'uel jini xch'oc. Lapbil i cha'an i pislel wen i t'ojol ba i ts'ijbal, che' bajche' i tilel mi' lapob jini xch'oc ba i yalobilob rey. ¹⁹Tamar tsi' ch'ama i tañil c'ajc. Tsi' p'ujp'u ti' jol. Tsi' jet' tsili i bujc. Che' woli ti xambal tsa' caji i ñup'ye' majlel i jol. Tsa' caji ti uq'uel majlel.

Absalón tsi' q'uextabe i mul Amnón

²⁰Absalón tsa' caji i c'ajtiben i yijts'in: ¿Jim ba a wascun Amnón tsa' ba i pi'leyet? Quijts'in, mach yomic ma' mel a pusic'al, come a wascuñach, che'en. Ch'ijiyem jax i pusic'al Tamar. Tsa' cale ya' ti' yotot Absalón. ²¹Che' ba tsi' yubi David pejtel jini tsa' ba ujt i, tsa' wen mich'a. ²²Absalón ma'anic tsi' letsa i t'an ti' contra Amnón, pero mich' i pusic'al cha'an tsa' pi'lebenti i yijts'in.

²³Che' ba ñumenix cha'p'ejl jab, Absalón tsi' p̄aya tilel winicob yujilo' ba i tsepol i tsutsel tiñame'. Che' ya' añob ti Baal Hazor am ba ti' tojel Efraín, Absalón tsa' caji i p̄ay tilel pejtelel i yalobilob rey. ²⁴Tsa' majli ba'an rey. Tsi' sube: Wale an c winicob yujilo' ba i tsepol i tsutsel tiñame'. Jini cha'an ti wocol t'an mic subeñet yom ma' tilel ti c'ux waj yic'ot querañob, che'en. ²⁵Jini rey tsi' jac'be: Calobil mach mejlicon lojon ti laj majlel, ame cabalic mi cac' lojon e'tel ti a wotot cha'an i bal lojon c ñac', che'en. Absalón tsa' caji i wersa p̄ay

majlel, pero ma'anic tsi' jac'Λ majlel. Tsa' jach i yΛq'ue i yutslel i t'an cha'an tijicña mi' c'otel i cha'len q'uiñijel. ²⁶ Absalón tsi' yΛΛ: Mi mach mejliquet ti majlel, che' jini a wocolic yom ma' choc majlel quic'ot jini queran Amnón, che'en. Jini rey tsi' jac'Λ: ¿Chuqui i ye'tel mi' majlel a wic'ot? che'en. ²⁷ Absalón tsi' wersa c'ajtibe cha'an mi' choc majlel Amnón. Tsi' yΛc'Λ i t'an jini rey. Che' jini tsa' majli Amnón yic'ot pejtelel i yerañob. ²⁸ Absalón tsi' sube jini x'e'telob i cha'an: Yom mi la' chΛcΛ q'uel Amnón che' wen tijicña jax woli' yubin che' woli' jap vino. Che' mic subeñetla: “TsΛnsanla Amnón”, mi cho'on, ti ora jach yom mi la' tsΛnsan. Mach yomic mi la' wis cha'len bΛq'uen, come joñon woliyon ti mandar. Tsa'ix c subeyetla, ch'ejl'esan la' bΛ, che'en. ²⁹⁻³⁰ Che'Λch tsi' meleyob jini x'e'telob i cha'an Absalón che' bajche' tsa' subentiyob. Pejtelel jini yañob' bΛ i yalobilob rey ti ora jach tsa' loq'uiyob ti puts'el ti mula tac. Che' woli to i xΛñob sujtel ya' ti bij, ju'ucñayob ti t'an. Tsa' caji i yubin jini rey David. Woli' yΛlob: Absalón tsi' laj tsΛnsa i yalobilob jini rey. Ma'anix tsa' cΛle mi juntiquilic, che'ob.

³¹ Ti ora jach tsa' tejchi ch'ojoyel jini rey David. Tsi' jet' tsili i pislel. Tsi' ñolchoco i bΛ ti lum yic'ot pejtelel jini x'e'telob i cha'an ya' bΛ añob ti' yotot. ³² Jini Jonadab (i yalobil Simea i yΛscun David) tsi' sube: Mach isujmic tsa' laj chΛmi a walobilob. Jini jach tsa' chΛmi Amnón. Tsi' yΛc'Λ i t'an a walobil Absalón cha'an mi' q'uextΛben i mul Amnón tsa' bΛ i pi'le Tamar i yijts'in Absalón. ³³ Jini cha'an c rey mach yomic ma' mel a pusic'al cha'an jini t'an, come mach isujmic tsa' laj chΛmiyob a walobilob. Jini jach Amnón tsa' chΛmi, che'en.

³⁴ Tsa' puts'i Absalón. Che' bΛ tsi' letsa i wut jini xcanta tejclum, tsi' q'uele woli' tilelob cabal winicob ti bij am bΛ ti wits ya' ti pat. ³⁵ Jonadab tsi' sube jini rey: Ixix tilel a walobilob. IsujmΛch che' bajche' tsac subeyet, che'en. ³⁶ Che' poj ujtcl jax to i suben, tsa' caji i q'uel ya'ix c'otel i yalobilob jini rey. C'am tsi' cha'leyob uq'uel. Tsi' cha'le uq'uel ja'el jini rey yic'ot i yaj e'telob. ³⁷⁻³⁹ Ti jim bΛ ora puts'emix majlel Absalón ba'an Talmai (i yalobil jini rey Amiud ya' ti Gesur). Jini rey David jal tsi' yuc'ta i yalobil. Uxp'ejl jab tsa' jale Absalón ya' ti Gesur. David yomic i cha' q'uel bajche' yilal Absalón, come tsa' c'unte' ñΛch'chocobenti i pusic'al che' chΛmenix Amnón.

Joab tsi' cha'le wersa cha'an mi' cha' pɔy sujtel Absalón

14 Joab tsi' yubi wolix i cha' mel i pusic'al jini rey cha'an Absalón. ²Tsi' pɔyɔɔ tilel juntiquil x'ixic wen p'ip bɔ i pusic'al ch'oyol bɔ ti Tecoa. Joab tsi' sube: Yom ma' mel a bɔ che' bajche' meba'. Che'ɔch yom ma' lɔp a pislel cha'an mi' tsictiyel i ch'ijiyemlel a pusic'al. Mach yomic ma' bon a bɔ ti xojocña bɔ perfume. Yom wen ch'ijiyem ma' pɔs a bɔ ti' tojlel jini rey che' bajche' meba' anix bɔ ora woli' yuc'tan i pi'ɔɔ. ³Yom ma' majlel ba'an jini rey cha'an ma' suben chuqui mic subeñet. Che' tsi' yɔɔɔ Joab.

⁴Che' bɔ tsa' c'oti jini x'ixic ba'an jini rey, tsi' ñocchoco i bɔ ti' tojlel. Tsi' yɔɔɔ: C rey, a wocolic p'untañon, che'en. ⁵⁻⁶Jini rey tsi' c'ajtibe: ¿Chuqui a wom? che'en. Jini x'ixic tsi' yɔɔɔ: Joñon meba'onix. Anix ora tsa' chɔmi c ñoxi'al. Añob cha'tiquil calobilob. Tsa' majliyob ti paxyal ti cholel. Tsa' cajiyyob ti leto. Come i bajñelob, ma'anic majqui tsi' tiq'uiyyob. Juntiquil tsi' tsɔnsa i yeran. ⁷Awilan, pejtelel c pi'ɔlob woli' wersa subeñoñob cha'an mi cɔc' ti tsɔnsɔntel jini tsa' bɔ i tsɔnsa i yeran. Mi tsa' ujti bajche' jini, mij cɔyɔɔɔ tic bajñelil. Che' jini muq'uiux i ñajayel i c'aba' c ñoxi'al. Che' tsi' yɔɔɔ jini x'ixic. ⁸Jini rey tsi' sube: Cucux ti sujtel ti a wotot. Muq'uiux caj c mel pejtelel chuqui tsa' subeyon, che'en. ⁹Jini x'ixic tsi' sube: Wocolix a wɔɔɔ, c rey. Pejtelel jini mulil la' ajnic tic wenta quic'ot c pi'ɔlob. Mach yomic mi' wis ajñel jini mulil ti a wenta, che'en. ¹⁰Jini rey tsi' sube: Mi an majqui mi' chɔn cajel ti t'an ti a contra, yom ma' pɔybeñon tilel ilayi. Ma'anix chuqui mi caj i tumbenet, che'en. ¹¹Pero mach jasɔlic tsi' yubi jini x'ixic. Tsi' chɔn cha'le t'an: Ti wocol t'an mic subeñet, c rey, c'ajtibeñon i yutslel lac Yum Dios. Mach yomix mi' chɔn tic'lɔntel jini calobil cha'an i q'uexol tsa' bɔ i mele, che'en. Jini rey tsi' jac'ɔ: Melelɔch come cuxul lac Yum, ma'anic mi caj i yajlel mi junt'ujmic i tsutsel i jol, che'en.

¹²Jini x'ixic tsi' yɔɔɔ: Awocolic, c rey, com to c subeñet yambɔ jump'ejl t'an, che'en. Jini rey tsi' yɔɔɔ: Subu, che'en. ¹³Jini x'ixic tsi' yɔɔɔ: ¿Chucoch mach che'ic ma' coltan pejtelel i winicob Dios? Che' bɔ tsa' wɔc'ɔ a t'an tic tojlel, tsa' bajñel tsictesa a mul, come ma'anic wola' cha' pɔy tilel jini puts'em bɔ a walobil. ¹⁴Isujm wersa mi lac chɔmel ti lac pejtelel.

Lajalonla bajche' ja' mu' ba i yajlel ti lum, mach ba mejlix ti cha' lujchel. Mi ma'anic ma' bac' pɔy tilel Absalón, mux i junyajlel sajtel ti a tojlel. Pero Dios mi' sajcan majlel jini sajtemo' ba. ¹⁵Jini cha'an tsa' tili c subeñet pejtelel jini t'an, come c pi'lob tsi' bac'tesayoñob. Jini cha'an tsac ña'ta tilel c pejcan jini rey. "Tic'la mi muq'uix i jac'beñon c t'an", cho'on tic pusic'al. ¹⁶Tsac ña'ta ja'el isujm muq'uix cajel a coltañon loq'uel ti' p'atalel jini yomo' ba i jisañon quic'ot calobil ti' tojlel Israel i tejlum Dios. ¹⁷Jini cha'an mic subeñet, c yum, cha'an yom ma' wac' a t'an cha'an mi' cha' tilel i ñucllel c pusic'al, come reyet wale. Lajalet bajche' juntiquil i yángel Dios mu' ba mejlel i ña'tan chuqui wen yic'ot chuqui jontol. Jini cha'an la' ajnic a wic'ot lac Yum Dios. Che' tsi' yala jini x'ixic.

¹⁸David tsi' sube jini x'ixic: Mach comic ma' wis mucbeñon mi ts'ita'ic jini mu' ba cajel j c'ajtibeñet, che'en. Jini x'ixic tsi' jac'la: Muq'uix c laj subeñet, c rey, che'en. ¹⁹Jini rey tsi' c'ajtibe: ¿Mach ba jinic Joab tsa' ba i subeyet tilel ilayi? che'en. Jini x'ixic tsi' jac'be: Jincuyi. Isujm che' bajche' tsa' subeyon c rey. Joab tsi' chocoyon tilel. Tsi' laj cantesayon bajche' yom mic subeñet. ²⁰Jini cha'an tsi' chocoyon tilel a winic Joab cha'an mi' q'uextayel a pusic'al. Cabal a ña'tabal che' bajche' juntiquil i yángel Dios. Wen a wujil chuqui an ti pañimil. Che' tsi' yala jini x'ixic.

²¹Jini rey tsi' choco ti pɔyol Joab. Tsi' sube: Wale tsa'ix c ña'ta bajche' yom mic mel. Cucu, cha' pɔya tilel Absalón, che'en. ²²Joab tsi' ñocchoco i ba ti' tojlel rey. Tsi' yaq'ue i yutsllel i t'an. Joab tsi' yala: Wale cujilix tsa'ix c taja i yutsllel a pusic'al, c yum rey, come tsa'ix a melbeyon chuqui tsaj c'ajtibeyet, che'en. ²³Ti ora tsa' majli Joab ti Gesur cha'an mi' pɔy tilel Absalón ti Jerusalén. ²⁴Pero jini rey tsi' yala: Che' mi' julel calobil, la' majlic ti' yotot. Mach comic mi' tilel i q'uelon, che'en. Jini cha'an che' ba tsa' c'oti Absalón, toj jach tsa' majli ti' yotot. Ma'anic tsa' majli ba'an jini rey.

Absalón tsi' contraji David

²⁵Ti jim ba ora ma'anic yamba winic ti Jerusalén wen i t'ojol ba bajche' Absalón, come c'ala ti' xin jol, c'ala ti' mal i yoc, ma'anic chuqui wis leco. ²⁶Junyajl ti jujump'ejl jab tsi' yac'la ti

q'uextabeyob i pusic'al israelob. Ma'anix tsi' chΛn c'uxbiyob David.

⁷Che' ñumenix champ'ejl jab, Absalón tsi' sube jini rey: Ti wocol t'an mij c'ajtibeñet chocoyon majlel ti Hebrón cha'an mic ts'actesan c t'an tsa' bΛ c sube lac Yum. ⁸Come jiñach tsa' bΛ cΛΛ che' ya'to añon ti Gesur ti Siria: “Muq'uic i cha' pΛyon majlel ti Jerusalén lac Yum, mi caj c ch'ujutesan ya' ti Hebrón”, cho'on. Che' tsi' yΛΛ Absalón. ⁹Jini rey tsi' sube: Cucu ti' ñach'tΛlel a pusic'al, che'en. Che' jini Absalón tsa' caji ti majlel ti Hebrón. ¹⁰Tsi' mucu choco majlel suboñel ti' tojlel pejtelel jini israelob ti Hebrón: Che' mi la' wubin i t'an trompeta, yom mi la' wΛl: “YumΛlix Absalón ti Hebrón”, che'etla. Che' tsi' yΛΛ Absalón. ¹¹Tsi' pΛyΛ majlel lujunc'al winicob ch'oyolo' bΛ ti Jerusalén. Mach ña'tΛbilib i cha'an jini winicob chuqui woli' ña'tan Absalón, come ma'anic tsi' tsictesabeyob. ¹²Che' woli to i yΛc' majtañΛ Absalón, tsi' choco ti pΛyol Ahitofel jini gilón, i yaj consejero David chumul bΛ ti tejclum i c'aba' Gilo. Ahitofel tsi' cΛyΛ David cha'an mi' tsajcan Absalón. Tsa' utsi caji ti p'ojlel jini winicob tsa' bΛ caji i tsajcañob Absalón.

¹³Tsa' c'oti t'an ba'an David: Jini israelob wolix i tsajcañob Absalón, che'en. ¹⁴Che' jini David tsi' sube i pi'Λlob ya' bΛ añob ti Jerusalén: Conla ti puts'el. Mi ma'anic mi lac majlel ti ora, mux caj i tilel Absalón cha'an mi' laj jisañonla yic'ot jini año' bΛ ti tejclum, che'en. ¹⁵Jini winicob tsi' subeyob: Conla, muq'uix c jac'beñet lojon ti pejtelel chuqui ma' subeñon lojon, che'ob. ¹⁶Tsa' loq'ui jini rey temel yic'ot i pi'Λlob año' bΛ ti' yotot. Tsa' jax cΛleyob lujuntiquil i yixic cha'an mi' cΛntañob jini otot. ¹⁷Che' bΛ tsa' c'oti jini rey ti cojix bΛ otot yic'ot pejtelel woli bΛ i pi'leñob majlel, tsa' poj cΛleyob. ¹⁸Jini x'e'telob i cha'año' bΛ David tsa' wa'leyob ti' t'ejl che' bΛ tsa' ñumiyob jini ceretejob, yic'ot peletejob, yic'ot getejob. Jiñobach xcΛntayajob. Tsa' ñumiyob yic'ot lujunc'al i cha'baje' (600) winicob ch'oyolo' bΛ ti Gat.

¹⁹Jini rey tsi' sube Itai: ¿Chuqui wola' cha'len ilayi? Cha' cucux ti sujtel ba'an jini tsiji' bΛ rey, come yañach bΛ lum baqui ch'oyolet, ajñesabilet loq'uel ti a lumal. ²⁰Come maxto anic ora tsa' juliyet. Jini cha'an mach yomic ma' ñusan wocol quic'ot ti bij. Mach wen ña'tabilib c cha'an

lojon baqui mi caj j c'otel lojon. Jini cha'an yom ma' cha' sujtet. Πλα majlel a pi'Allob a wic'ot. La' i wen coltañet majlel lac Yum, che'en David. ²¹Jini Itai tsi' jac'be: Melel mic subeñet, come cuxul lac Yum Dios, come cuxulet c rey. Baqui jach ma' majlel, mic majlel ja'el. Mi mux caj a chamel, o mi mux caj a coel, mi caj j coltañet, che'en. ²²David tsi' sube Itai: Uts'at bajche' wola' ña'tan. Conla, che'en jini rey. Jini cha'an Itai yic'ot i pi'Allob tsa' majliyob yic'ot i winicob. ²³C'am woliyob ti uq'uel ti pejtelel xchumtal tac. Tsa' tsictiyi ti ñajtal. Che' ya' wa'al jini rey tsa' c'axiyob ti junwejl ja' i c'aba' Cedrón. Pejtelel jini winicob tsa' ñumiyob majlel ti' bijlel jini colem ba i tiquiñal pañimil.

²⁴Tsa' majli Sadoc ja'el yic'ot pejtelel jini levijob woli ba i q'uechob majlel jini Arca ba' lotol Xuc'ul ba i T'an lac Yum. Tsa' poj wa'leyob yic'ot jini Arca ti' tojlel Abiatar jinto tsa' laj loq'uuyob winicob ti tejclum. ²⁵⁻²⁶Jini rey tsi' sube Sadoc: Cha' q'uechex majlel jini Arca i cha'an lac Yum ya' ti tejclum. Mi uts'at mi' q'uelon lac Yum ti' yutsllel i pusic'al, muqu'ix i cha' palyon tilel cha'an mic cha' q'uel jini Arca ya' ti' yajñib. Pero mi mach yomix i q'uelon c Yum, che' jini wa' añon cha'an mi' melbeñon chuqui yom, che'en David. ²⁷Jini rey tsi' cha' sube: ¿Mach ba cabalic a ña'tabal? Yom ma' cha' sujtet ti tejclum yic'ot Abiatar. Πλα majlel Ahimaas a walobil yic'ot Jonatán (i yalobil Abiatar). ²⁸Yom ma' cha' chocob tilel. Joñon mi caj c poj pijtañob ya' ba' mi laj c'axel ti ja' ti' bijlel jini colem ba i tiquiñal pañimil. Jinto mi' cha' julelob mi caj cubin chuqui woli' yujtel ti tejclum, che'en. ²⁹Che' jini Sadoc yic'ot Abiatar tsi' cha' q'uecheyob majlel jini Arca i cha'an ba lac Yum ya' ti Jerusalén. Ya' tsa' cleyob.

³⁰Tsi' cha'le uq'uel David che' ba tsa' letsi majlel ya' ti ñlacacña ba wits ba'an olivote'. Che' woli' letsel majlel, ma'anic i pixol mi i warachic. Pejtelel jini winicob tsa' ba i tsacleyob majlel woliyob ti uq'uel ja'el. ³¹An majqui tsa' tili i suben David ya'an Ahitofel yic'ot i consejerojob Absalón. Jini cha'an David tsi' cha'le oración: C Yum, yom ma' socben i pensar Ahitofel, che'en. ³²Che' ba David tsa' c'oti ya' ti' pam wits baqui mi' ch'ujutesantel Dios, tsa' tili i taj Husai jini arquita, laj tsijlemtic jax i bujc. An ts'u'bejn

ti' jol. ³³David tsi' sube: Mi tsa' pi'leyon ti majlel, wocol jax mi caj cubin. ³⁴Pero cucu suben Absalón: "C rey, a winiconix wale. Mi caj j coltañet ti pejtelel ora che' bajche' tsaj colta a tat c'AlAl wale. Mi caj c melbeñet pejtelel chuqui ma' wAl". Che'ach yom ma' suben. Che' jini mi mejlel a jemben i t'an Ahitofel. ³⁵Mi caj i yajñelob a wic'ot jini motomaj Sadoc yic'ot Abiatar. Pejtelel chuqui ma' wubin ti' tojlel jini rey yom ma' cha' suben jini motomaj Sadoc yic'ot Abiatar. ³⁶Ya'ach añob Ahimaas (i yalobil Sadoc) yic'ot Jonatán (i yalobil Abiatar). Subeñob pejtelel chuqui tac mi' yAl jini rey cha'an mi' cha' tilelob i subeñon. Che' tsi' yAlA David. ³⁷Che' jini tsa' majli Husai ya' ti Jerusalén. Jiñach i yamigo David. Ti jim bA ora che' woli to i c'otel Absalón ya' ti Jerusalén, tsa' c'oti Husai ja'el.

16 Che' bA tsa' ts'ita' letsi ti wits David, tsa' caji i q'uel ya'ix tilel Siba i yaj e'tel Mefiboset. Woli' ch'Am tilel cha'cojt burro cuchbil bA i cha'an lujunc'al pan yic'ot jo'c'al ti pajl tiquin bA ts'usub, yic'ot jo'c'al ti pajl ts'usub mach bA tiquinic, yic'ot jump'ejl lata i ya'lel ts'usub. ²Jini rey tsi' c'ajtibe: ¿Chuqui i ye'tel iliyi? che'en. Siba tsi' jac'Λ: A majtañach ili burro tac cha'an mi' c'achtañob majlel a pi'Allob. Ch'AmA jini pan ja'el yic'ot i wut te' cha'an mi' c'uxob jini x'e'telob a cha'an. Jini i ya'lel ts'usub la' i japob ti bij jini mu' bA i lujb'añob, che'en. ³Jini rey tsi' c'ajtibe: ¿Baqui an i yalobil a yum? che'en. Siba tsi' jac'Λ: Ya' tsa' cAl e ti Jerusalén. Come woli' yAl wersa mi caj i sutq'uibeñob jini israelob i yumAntel i tatuch, che'en. ⁴Jini rey tsi' cha' sube Siba: Awilan a cha'añach pejtelel chuqui an i cha'an Mefiboset, che'en. Siba tsi' ñocchoco i bA. Tsi' yAlA: Wocolix a wAlA, c rey. Yom ma' q'uelon ti uts'at, che'en.

⁵Che' bA woli' c'otel David ti Bahurim, tsa' tili Simei (i yalobil Gera). Jiñach i pi'Al Saúl. Woli' p'aje' tilel David. ⁶Tsa' caji i jul ti xajlel David yic'ot x'e'telob i cha'an ti pejtelelob. ⁷Simei wen c'am woli' cha'len p'ajoñel ti' contra David. Woli' yAl: Loq'uen ti ora xjontolil, stsAnsajet. ⁸Lac Yum wolix i yAlq'ueñet a toj pejtelel a mul cha'an tsa' chilbe i ye'tel Saúl. An ti a wenta bajche' tsa' chAmi Saúl yic'ot i pi'Allob. Jini cha'an lac Yum tsa'ix i yAlq'ue a yumAntel ti' wenta a walobil Absalón. Wale ujux awilal cha'an a jontolil yic'ot cha'an a tsansa, che'en Simei.

⁹Abisai (i yalobil Sarvia) tsi' sube jini rey: ¿Chucoch leco mi' tilel i p'ajet ili tuwen ts'i'? Subeñon majlel cha'an mic set' t'ojben i bic', che'en. ¹⁰Jini rey tsi' jac'Λ: Mach che'ic yom. Isujm leco woli' p'ajon. Tic'Λl mi lac Yum tsi' sube cha'an mi' p'ajon. ¿Bajche' mi mejlel c tic' che' jini? che'en David. ¹¹Jini mero calobil yomix i tsΛnsañon. Mi che'Λch mi' mel calobil, ¿mach ba yomic mi' p'ajon j contra? Come lac Yum tsi' sube jini benjamín cha'an mi' p'ajon. ¹²Tic'Λl mi muq'uix i p'untañon lac Yum cha'an wolic ts'a'lentel, che'en David. ¹³Ya' ti' t'ejl bij baqui tsa' ñumi an bujtΛl. Che' woliyob ti xΛmbal majlel David yic'ot i winicob, jini Simei woli' p'aj majlel ya ti' ts'ejtΛlel jini wits. Tsi' julu ja'el ti xajlel yic'ot ti lum tac. ¹⁴Che' bΛ c'otemobix ti Jordán ja', jini rey yic'ot i pi'Λlob ti xΛmbal tsa' caji i c'ajob i yo, come wen lujbeñobix.

¹⁵Absalón yic'ot Ahitofel yic'ot pejtelel jini winicob tsa' ochiyob ti Jerusalén. ¹⁶Husai jini amigo i cha'an David tsa' c'oti i taj Absalón. Tsi' yΛΛ: La' subjic i ñucler c rey, che'en. ¹⁷Absalón tsi' c'ajtibe Husai: ¿Jim ba i xuc'tilel a pusic'al yic'ot a yum? ¿Chucoch ma'anic tsa' pi'le majlel? che'en. ¹⁸Husai tsi' jac'be: Mi caj cajñel quic'otet come reyetix yajcΛbil bΛ i cha'an lac Yum ti' tojlel pejtelel israelob. Mi caj c tsΛclañet. ¹⁹¿Mach ba yomic mic yumañet? ¿Mach ba i yalobiletic David? Che' bajche' tsac wen melbe i ye'tel a tat, che' ja'el mi caj c melbeñet a we'tel, che'en.

²⁰Che' jini Absalón tsi' sube Ahitofel: Yom ma' tsictesΛbeñon chuqui tac yom mi lac mel, che'en. ²¹Ahitofel tsi' sube: Yom ma' majlel ba'an i yixicob a tat, come ya' tsi' cΛyΛyob ti cΛn otot. Che' mi' yubiñob pejtelel año' bΛ ti tejclum, mi caj i ña'tañob tsa'ix a ts'a'le a tat. Mach mejlix a cha' uts'esan a bΛ yic'ot. Che' jini mi cajel i ñumen p'Λt'añob pejtelel a winicob, che'en. ²²Tsa' caji i wa'chocobeñob pisil bΛ i yotot Absalón ya' ti q'uiyil bΛ i jol i yotot i tat. Absalón tsa' caji ti ajñel yic'ot i yixicob i tat ti' wutob pejtelel israelob. ²³Ti jim bΛ ora Absalón tsi' c'ajtibe consejo Ahitofel, come cabΛlΛch i ña'tΛbal che' bajche' tilem ti Dios. Che' bajche' tsi' colta David ti yambΛ ora tsa' caji' coltΛben i yalobil.

I consejo Ahitofel yic'ot Husai

17 Ahitofel tsi' sube Absalón: La' c bac' yajcan lajch'antiquil mil winicob cha'an mi' loq'uelob wale ti ac'alel cha'an mi' contrajíñob David ti guerra. ²Che' jini mi caj c taj che' wen lujb i bac'tal, che' wen ch'ijiyem. Mi caj c tats' loq'uel David ba'an i pi'lob. Mi' cajelob ti puts'el. Che' jini mi mejlel a tsansan jini rey che' i bajñel. Muq'uix caj a cha'len rey ti Israel ti' q'uexol a tat. ³Che' jini mi caj c cha' p'ay tilel ba'añet pejtelel jini winicob, come juntiquil jach jini woli ba a contrajin. Jini cha'an che' mi' jaq'uetob pejtel winicob, ñach'al mi caj i yajñelob. Che' tsi' yalal Ahitofel. ⁴Uts'at tsi' yubi ili t'an Absalón yic'ot pejtelel jini xñoxtaco' ba año' ba ti Jerusalén.

⁵Absalón tsi' yalal: P'ayal tilel ja'el Husai jini arquita cha'an mi la cubin chuqui mi' subeñonla, che'en. ⁶Che' ba tsa' tili Husai, Absalón tsi' sube pejtelel i t'an Ahitofel. Tsi' c'ajtibé: ¿Bajche' ma' ña'tan jatet? ¿Yom ba mi lac jac'ben jini t'an? Mi mach yomic, subeñon, che'en. ⁷Che' jini Husai tsi' jac'be Absalón: Mach uts'atic jini t'an tsa' ba ujti i subeñet Ahitofel, che'en. ⁸Come cambilix a cha'an a tat yic'ot pejtelel i winicob. Wen ch'ejlob ti guerra, cojco to wale, wen mich'ob, lajalob bajche' bajlum tsa' ba chilbenti i yal. Che'ach ja'el a tat come wen ñamal ti guerra. Mach jijlic yic'ot i yonlel i soldadojob ti ili ac'alel. ⁹Tic'al mi puts'em ti mal ch'en. Mi tsa' bac' tsansanti cha'tiquil uxtiquil a winicob che' woli jax to i tejchel jini guerra, mi caj i yalob: “Woli' majlel i cha'an David. Wolix i jisañonla cha'an woli lac tsajcan Absalón”, che'ob. ¹⁰Anquese wen p'at'lob jini winicob bajche' bajlum, mi' cajelob ti baq'uen, come cambilix i cha'an pejtelel israelob wen yujil guerra a tat yic'ot pejtelel i winicob. ¹¹Jini cha'an mic subeñet, la' i tempañob i ba pejtelel israelob ti a tojlel, jini año' ba ti Dan c'alal ti Beerseba. Yom wen cabal jini winicob che' bajche' i ji'il colem ja'. Che' jini mi caj a p'ayob majlel jatet, che'en. ¹²Mi caj lac tajob baqui jach añob. Mux caj lac pam ñumel ti' tojlelob che' bajche' mi' yajlel ye'eb ti pañimil. Che' jini ma'anix mi caj i coel David yic'ot i pi'lob mi juntiquilic. ¹³Mi tsa' ochi i tajob i col'antel ti jump'ejl tejclum, che' jini pejtelel israelob mi caj i ch'amob tilel lazo cha'an mi' jexbañob majlel

i ts'ajquil tejclum. Mux i chojquel ti joctal jinto che' jocholix mi' clɣtal jini otot tac. Che' tsi' yala Husai. ¹⁴Absalón yic'ot pejtelel jini israelob tsi' yalayob: Uts'at bajche' tsi' ña'ta Husai jini arquita. Mach uts'atic tsi' can ña'ta Ahitofel, che'ob. Come lac Yum tsi' ña'ta i jem jini uts'at ba i t'an Ahitofel cha'an mi' yac' ti wocol Absalón.

¹⁵Jini cha'an Husai tsa' majli i laj suben jini motomaj Sadoc yic'ot Abiatar: Che'ach tsi' cha'le t'an jini Ahitofel ti' tojlel Absalón yic'ot ti' tojlel jini xñoxo' ba. Pero mach che'ic tsac subeyob. Absalón yic'ot x'e'telob i cha'an tsi' ñopoyoñob, che'en. ¹⁶Tsi' yala ja'el: Jini cha'an yom mi la' se'ñun la' ba cha'an mi la' choc majlel suboñel ti' tojlel David, cha'an ma'anic mi' clɣtal ya' ti' ti' jini ja'. Wale ti ac'alel yom mi' c'axel ti ora cha'an ma'anic mi' tsansantel yic'ot pejtelel woli ba i pi'leñob majlel, che'en.

¹⁷Ti jim ba ora Jonatán yic'ot Ahimaas woli' pijtañob suboñel ya' ti' tojel jini ja' i c'aba' Rogel. Juntiquil criada tsa' majli i tsictesabeñob jini t'an, ame anic majch mi' q'uelob ti tejclum. Che' ba tsi' yubiyob jini cha'tiquilob, ti ora jach tsa' majli i subeñob David. ¹⁸Pero juntiquil ch'iton tsi' q'ueleyob. Tsa' majli i bac' suben Absalón, pero jini cha'tiquilob ti ora jach tsi' chucuyob loq'uel i yajnel. Tsa' c'otiyob ti' yotot juntiquil winic am ba ti Bahurim. Ya'an tocbil ba pozo ti patio ti' t'ejl i yotot. Ya' tsa' bac' ochiyob Ahimaas yic'ot Jonatán. ¹⁹Che' jini tsa' loq'ui ti otot i yijnam jini winic. Tsa' tili i macben i ti' jini pozo. Tsi' ts'ita' p'ujp'u trigo ya' ti' pam. Jini cha'an ma'anic tsi' wis ña'tayob mi an majqui ochem ya'i. ²⁰Che' ba tsa' c'otiyob i winicob Absalón ya' ti otot, tsi' c'ajtibeyob jini x'ixic: ¿Baqui tsa' majliyob Ahimaas yic'ot Jonatán? che'en. Jini x'ixic tsi' jac'la: Tsa'ix c'axiyob ya' ti' junwejl ja', che'en. Ti ora jach tsa' majliyob jini winicob cha'an mi' saclañob. Che' ma'anic tsi' tajayob tsa' cha' sujtiyob ti Jerusalén. ²¹Che' cha' sujtemobix i winicob Absalón, tsa' cha' loq'uiyob Ahimaas yic'ot Jonatán. Tsa' majli i tsictesabeñob David chuqui woli' yujtel. Tsi' subeyob: Yom mi la' se'ñun la' ba cha'an mi la' c'axel ti ja', come Ahitofel woli' suben Absalón cha'an mi' bac' tilel i contrajinet, che'ob. ²²Ti ora tsa' cajiyoob ti c'axel ti Jordán ja' David yic'ot pejtelel i winicob. Che' ti sac'ajel ma'anix majch tsa' cale mi juntiquilic.

²³Che' ba tsi' q'uele Ahitofel ma'anic woli' jac'beñob i t'an, tsa' cha' sujti majlel ti' yotot ya' ti' tejclum. Tsa' ujti i wan q'uel pejtél chuqui an ti' yotot. Che' jini tsi' jich'i i ba. Tsa' chami. Tsi' mucuyob ya' ba' tsa' mujqui i tat.

Guerra ti' tojlel David yic'ot Absalón

²⁴Che' ba tsa' c'axi Absalón yic'ot israelob ya' ti' Jordán ja', c'otemix David c'Alal ti Mahanaim. ²⁵Absalón tsi' wa'choco ti e'tel Amasa ti' q'uexol Joab cha'an mi' cantan soldadojob. I tat Joab jiñach Itra jini ismael tsa' ba i pɣɣ Abigail (i yalobil Nahas). Tsi' pi'le ja'el Sarvia (i ña' Joab). Jini Sarvia i yijts'iñach Abigail. ²⁶Tsa' c'oti Absalón ti Galaad yic'ot pejtelel jini israelob. ²⁷Che' ba tsa' c'oti David ti Mahanaim, tsa' tili i taj Sobi (i yalobil Nahas ch'oyol ba ti Rabá ba'an jini amoñob), yic'ot Maquir (i yalobil Amiel ch'oyol ba ti Lodebar), yic'ot Barzilai jini am ba ti Galaad ti Rogelim. ²⁸⁻²⁹Tsi' ch'ambeyob tilel i majtan David, pojp tac, yic'ot tsuts, yic'ot taza tac, yic'ot poc' tac, yic'ot trigo, yic'ot cebada, yic'ot harina, yic'ot bu'ul, yic'ot lenteja, yic'ot chab, yic'ot lew, yic'ot queso. Tsi' yalq'ueyob David yic'ot i pi'lob cha'an mi' c'uxob, come tsi' ña'tayob mux i chamelob ti wi'ñal yic'ot tiquin ti' cha'an cabal xambal.

Tsa' chami Absalón

18 David tsi' tsolo i soldadojob. Tsi' wa'choco jini mu' ba i q'uelob soldadojob. Tsi' t'oxoyob tac ti jujump'ejl mil yic'ot ti jo'jo'c'al. ²Tsi' t'oxoyob ti uxmojt. Tsa' caji i chocob majlel ti guerra. Jini junmojt tsa' majli yic'ot Joab. I cha'mojtlel tsa' majli yic'ot Abisai i yascun Joab (i yalobil Sarvia). I yuxmojtellel tsa' majli yic'ot Itai jini geteo. Tsi' yala jini rey: Muq'uix c majlel ja'el ti guerra la' wic'ot, che'en.

³Pero jini winicob tsi' subeyob: Mach yomic ma' majlel, come mi tsa' puts'iyon lojon ma'anic mi caj i p'ison lojon ti wenta jini laj contrajob. Anquese mic chamel lojon ti ojilil, ma'anic chuqui mi' cha'len. Pero jatet wen ñuc a c'ajñibal che' bajche' lujump'ejl mil winicob. Jini cha'an yom ma' c'aytal ti tejclum cha'an ma' chocbeñon lojon tilel j coltanel lojon ya' baqui mic majlel lojon, che'ob. ⁴Jini cha'an jini rey tsi' yala: Uts'at bajche' mi la' wal. Muq'uix c jac'beñetla, che'en. Che' jini

tsa' wa'le jini rey ya' ti' ti' jini tejclum. Tsa' loq'uiyob jini soldadojob ti mojt ti mojt, ti jo'jo'c'al, yic'ot ti jujump'ejl mil tac. ⁵Jini rey tsi' sube Joab, yic'ot Abisai, yic'ot Itai: Yom tsajiletla ame anic majqui mi' yac' ti wocol ch'iton ba calobil Absalón, che'en. Pejtelel jini soldadojob tsi' yubiyob che' ba tsi' subeyob jini rey cha'an ma'anic mi' tsansañoob Absalón. ⁶Tsa' tejchi guerra ti te'el tac i c'aba' Efraín. ⁷Pejtelel i winicob David tsa' wen majli i cha'añoob. Cabal israelob tsa' jiliyob ti jini guerra. Ti pejtelel tsa' chamiyob che' bajche' junc'al mil winicob. ⁸Tsa' ñumi jini guerra c'alal ti ñajtal. Cabal jini winicob tsa' jiliyob ya' ti te'el. Mach cabalobic tsa' jiliyob ti espada.

⁹I winicob David tsa' bac' c'oti i q'uelob Absalón. C'achacña woli' tilel Absalón ti mula. Tsa' caji ti puts'el Absalón, pero che' ba tsa' ñumi jini mula ti yebal juntejc te' ba' cabal jax i c'ab, tsa' joc' cale i tsutsel i jol ti' xac' jini te'. Tsa' ts'uy cale che' ñumenix jini mula. ¹⁰Juntiquil soldado tsa' ba i q'uele Absalón ya' ba' joc'ol tsa' majli i suben Joab: Ya' tsa' joc' cale Absalón ti' xac' jini te', che'en. ¹¹Joab tsi' sube: Mi tsa' q'uele, ¿chucoch ma'anic tsa' bac' tsansa? che'en. Tsa'ic a tsansa tsa calq'ueyet lujump'is plata yic'ot jump'ejl cajch'iñac', che'en. ¹²Jini winic tsi' jac'be Joab: Tsa'ic a lon aq'ueyon mil sacac taqu'in, ma'anic tsac tsansabe i yalobil rey, come tsa cubi lojon i mandar jini rey che' ba tsi' subeyet jic'ot Abisai, yic'ot Itai: “A wocolic pasbenla i yutslel la' pusic'al jini ch'iton ba calobil Absalón”, che'en David. ¹³Tsa'ic c tsansa, muqu'ux c wersa tsictiyel come mach mejlic lac wis lotin lac rey. Tsa'ic c mele bajche' jini, tsa' wac'ayon ti wocol jatet. Che' tsi' yala jini soldado. ¹⁴Joab tsi' sube: Wolic lon ñusan q'uin ti t'an, che'en. Ti ora jach tsi' loc'sa uxts'ijt i te'el i jalajb. Tsi' ts'ap julu ti' pusic'al Absalón che' mero cuxul to ya' ti xac' jini te'. ¹⁵Ti ora jach tsa' tiliyob lujuntiquil i soldadojob Joab cha'an mi' junyajlel tsansañoob Absalón.

¹⁶Joab tsi' wusu jini trompeta cha'an mi' cay i tsacleñoob majlel i contrajob. ¹⁷Tsi' chocoyob i bac'tal Absalón ti joctal ya' ti te'el. Tsi' mac'ayob ti wen colem tac ba xajlel. Pejtelel jini israelob tsa' cajiyob ti puts'el majlel cha'an mi' sujtelob ti' yototob. ¹⁸Che' cuxul to Absalón, tsi' wa'choco jump'ejl ts'ajc ya' ti joctal i cha'an ba rey come tsi' yala: Ma'anic

calobil cha'an mi' chʌn ña'tʌntel j c'aba', che'en. Jini cha'an tsi' yotsʌbe i c'aba' jini ts'ajc, I ts'ajc Absalón. C'ʌʌʌ ti ili ora che'ʌch mi' pejʌntel.

¹⁹Ahimaas (i yalobil Sadoc) tsi' yʌʌʌ: La' majlicon ti ora cha'an mic tsictesʌben lac rey, come lac Yum tsa'ix i yʌc'ʌ ti jilel laj contrajob, che'en. ²⁰Joab tsi' yʌʌʌ: Mach yomic ma' majlel jatet. Ti yanto bʌ ora mi mejlel a ch'ʌm majlel t'an pero mach wʌleyic, come chʌmenix i yalobil rey, che'en. ²¹Joab tsi' sube juntiquil winic etíope: Cucux, suben jini rey chuqui tsa' q'uele, che'en. Jini winic tsi' c'uchchoco i bʌ ti' tojlel Joab. Tsa' caji ti majlel ti ajñel ba'an rey. ²²Ahimaas i yalobil Sadoc tsi' cha' sube Joab: La' ujtíc chuqui tac yom ujtél tic tojlel, pero wersa com majlel ti' pat jini etíope, che'en. Joab tsi' sube: Calobil, ¿chucoch ma' lon majlel ti ajñel? Cʌxti wenic jini t'an mu' bʌ caj a sub, che'en. ²³Jini Ahimaas tsi' jac'ʌ: La' ujtíc chuqui mi' caj ti ujtél. Wersa mic majlel, che'en. Joab tsi' sube: Cucu che' jini, che'en. Jini cha'an ti ajñel tsa' majli Ahimaas ti bij mu' bʌ i ñumel ti joctʌl ba'an jini Jordán ja'. Tsi' cha' ñusa jini etíope tsa' bʌ ñaxan chojqui majlel.

²⁴Ti jim bʌ ora buchul David ya' ti' tojel i ti' tejclum. Ya' wa'al jini xcʌntaya ti' jol i yotot am bʌ ti chañelal jini ts'ajc. Che' bʌ tsi' letsa i wut, tsi' can q'uele woli' tilel ti ajñel juntiquil winic. ²⁵Jini xcʌntaya ora jach tsi' tsictesbe jini rey. Jini rey tsi' yʌʌʌ: Mi juntiquil jach jini tal bʌ ti ajñel an chuqui yom i tsictesan, che'en. Woli' lac'tesan tilel i bʌ. ²⁶Ti ora jini xcʌntaya tsi' q'uele woli' tilel ti ajñel yambʌ. Tsi' bac' sube jini mu' bʌ i cʌntan i ti' tejclum: Woli' tilel yambʌ winic, che'en. Jini rey tsi' yʌʌʌ: An chuqui yom i sub jini winic ja'el, che'en. ²⁷Jini xcʌntaya tsi' yʌʌʌ: Wolij q'uel bajche' mi' cha'len ajñel jini ñaxan bʌ. Lajal yilal bajche' Ahimaas (i yalobil Sadoc), che'en. Jini rey tsi' yʌʌʌ: Uts'at jini winic. Woli' ch'ʌmbeñonla tilel wen bʌ t'an, che'en.

²⁸Ahimaas c'am tsi' pejca jini rey: Laj uts'at ti pejtelel, che'en. Tsi' c'uchchoco i bʌ ti' tojlel jini rey. Tsi' yʌʌʌ: La' sujbc i ñuclél lac Yum Dios, come tsa'ix majli lac cha'an ti guerra ti' tojlel jini tsa' bʌ i contrajiyet, c yum, che'en. ²⁹Jini rey tsi' c'ajtibe: ¿Uts'at ba an Absalón? che'en. Ahimaas tsi' jac'ʌ: Che' bʌ tsi' chocoyon tilel a winic Joab, tsaj q'uele jomolob winicob, pero mach cujilic chuqui tsa' ujti, che'en.

³⁰Jini rey tsi' yala: Wa'i to ilayi, che'en. Tsa' caji ti wa'tal ti ts'ejtal jini rey. ³¹Ti wi'il tsa' c'oti jini etiope. Tsi' yala: C rey uts'at bajche' tsa' ujtí. Lac Yum tsa'ix i laj jisa pejtelel jini tsa' ba i contrajiyetob, che'en. ³²Jini rey tsi' c'ajtibe: ¿Uts'at ba an Absalón? che'en. Jini winic tsi' jac'la: La' tsansantícob pejtelel a contrajob che' bajche' tsa' tsansanti Absalón, che'en.

³³Tsa' toj sajti i pusic'al David. Ti ora tsa' letsí majlel ti jini otot am ba ti' chañelal ts'ajc. Tsi' cha'le uq'uel. Tsi' yala: ¡Bajche' tsa' ujtíyet calobil Absalón, calobil Absalón! che'en. Uts'at tsa'ic chamiyon cha'añet cha'an ma'anic ma' chamel, calobil. Che' tsa' uq'ui David.

Joab tsi' toj'esa David

19 An majqui tsi' sube Joab: Jini rey woli ti wen uq'uel cha'an tsa' tsansanti Absalón, che'en. ²Ti jim ba q'uin tsa' wen caji i melob i pusic'al pejtelel winicob, come tsi' yubiyob woli ti wen uq'uel jini rey cha'an tsa' tsansanti Absalón. ³Ti mojt ti mojt tsa' cajiyoj ti sujtel jini winicob ya' ti tejclum, che' bajche' soldadojob mu' ba i cha'leñob baq'uen che' mi' puts'elob ti guerra. ⁴Pero jini rey tsi' mucu i wut. C'am tsi' chan uc'ta Absalón: ¡Bajche' tsa' ujtíyet, calobil, bajche' tsa' ujtíyet, Absalón, calobil! che'en David. ⁵Joab tsa' majli ba'an jini rey. Tsi' sube: Wale tsa'ix a quisintesayob pejtelel a winicob tsa' ba i coltayetob yic'ot a walobilob, jini xch'oc tac ba a walobilob, yic'ot ja'el winicob, yic'ot a wijñamob, yic'ot a wixicob, che'en. ⁶Wolix a cha' c'uxbin jini tsa' ba i contrajiyetob, pero wolix a ts'a'len jini mu' ba i c'uxbiñetob. Wolix a pasbeñon lojon, uts'at tsa'ic chamiyon lojon tic pejtelel lojon, jini yumalob yic'ot pejtél a winicob. Pero mach uts'atic che' chamen Absalón. Mu' jach a c'uxbin Absalón. Ma'anic ma' wis p'ison lojon ti ñuc. ⁷Jini cha'an yom ma' majlel ti ora cha'an ma' pejcan jini winicob ti uts'at, come mic subeñet mi ma'anic ma' bac' loq'uel a pejcañob ti' tojlel lac Yum, wale jach mi caj i laj majlelob. Ma'anic majqui mi caj i clytal a wic'ot. Che' jini cabal jax mi caj a wubin wocol. Mero ts'ita' tsa' wubi che' ch'itoñet to c'lalal wale. Che' tsi' yala Joab.

Tsa' sujti David ti Jerusalén

⁸Jini cha'an jini rey tsa' majli ti buchtal ti' ti' jini tejclum. Tsa' subentiyob jini winicob cha'an ya'ix buchul jini rey ya' ti' ti' tejclum. Tsa' cha' tiliyob ba'an jini rey. Pero jini israelob tsa' ba i tsacleyob majlel Absalón laj puts'emobix majlel ti' yotot ti jujuntiquil. ⁹Pejtelel jini tejclumob woliyob ti a'leya. Woli' yalob: Jini lac rey tsa'ix mejli i coltañonla ti' tojlel laj contrajob yic'ot ti' tojlel jini filisteojob, pero wale tsa'ix puts'i ti' tojlel i yalobil Absalón cha'an baq'uen. ¹⁰Tsa' lac yajca Absalón pero tsa'ix chami ti guerra. ¿Chucoch ma'anic mi lac cha' paly tilel jini rey? che'ob.

¹¹David tsi' choco majlel t'an ba'an jini motomajob Sadoc yic'ot Abiatar. Tsi' subeyob majlel i c'ajtibeñob jini xñoxob ti Judá: ¿Mach ba yomix mi la' cha' paly ochel jini rey ti' yotot? Come pejtela la' pi'lob ti Israel yomobix i cha' otsañob ti' yotot.

¹²Jatetla querañetla, c bacc'taletla, c baqueletla. ¿Chucoch wi'ilix mi la' wac' la' t'an cha'an mi la' wotsan ti' yotot? che'etla. ¹³Pejcanla Amasa ti uts ba t'an. Suben: “Lac pi'la lac ba. Junlajal lac bacc'tal yic'ot lac baquel. La' q'uic'ot. Mux awilan cha'an cuxul lac Yum, mi caj a wochel ti a we'tel ti' wenta Joab. Mach loq'uiquet ti a we'tel ti pejtelel ora”, che'en David. ¹⁴Che' jini Amasa tsi' wera ac'ayob i ñopben i t'an David ti junsujm jach i pusic'al. Tsi' chobeyob majlel t'an jini rey cha'an mi' sujtel yic'ot pejtelel i winicob. ¹⁵Tsa' cha' c'oti jini rey ya' ti Jordán ja'. Jini chumulo' ba ti Judá tsa' tiliyob c'lalal ti Gilgal cha'an mi' pi'leñob ti c'axel jini rey ti Jordán.

¹⁶Simei (i yalobil Gera), jini benjamín ch'oyol ba ti Bahurim, tsa' tili ti ajñel yic'ot jini loquemo' ba ti Judá cha'an mi' taj jini rey David. ¹⁷Jump'ejl mil winicob ch'oyolo' ba ti Benjamín tsa' tiliyob yic'ot Simei. Tsa' tili Siba ja'el, i winic Saúl, yic'ot ch'iton ba i yalobilob ti jo'lujunticlel, yic'ot junc'al i yaj e'telob. Ti ajñel tsa' tili i tajob jini rey ya' ti Jordán. ¹⁸Tsa' caji i t'umob ja' cha'an mi' c'axtesañob ñumel ti ja' i pi'lob, yic'ot i chubal'an jini rey. Simei (i yalobil Gera) tsa' caxi ti ja' ti' tojlel i pasibal q'uin. ¹⁹Tsa' caji i suben jini rey: Awocolic mach a chan c'ajatesan c jontolil tsa' ba c mele che' ba tsa' loquiyet ti Jerusalén. Mach a chan p'is ti wenta. ²⁰Come ti isujm mulilach jini tsa' ba c mele. Jini cha'an ti pejtelel i p'olbal

José ñaxañon tsa' tili c tajet majlel, che'en. ²¹Pero Abisai (i yalobil Sarvia) tsi' ya λ : ¿Mach ba yomic mi' wersa tsansantel Simei cha'an tsa'ix i p'aja jini yajcabil ba i cha'an lac Yum? che'en. ²²David tsi' jac' λ : Mach che'ic yom ma' subeñon, i yalobil Sarvia. Leco bajche' wola' ña'tan. J contrajet yilal. ¿Jim ba i yorajlel wale cha'an mi' chamel juntiquil israel? ¿Mach ba cujilic reyon ti Israel? che'en. ²³Jini rey tsi' sube Simei: Mach chamiquet, che'en. Tsi' wa'choco i t'an jini rey.

²⁴Mefiboset (i buts Saúl) tsa' tili i taj David che' woli' sujtel ti' yotot. Maxto anic tsi' poco i yoc. Maxto jujchibilic i tsucti'. Maxto qu'uxtayemic i pislel c' λ λ ti jini q'uin che' ba tsa' loq'ui David ti Jerusalén ti' tejchibal guerra c' λ λ tsa' sujti ti uts'at. ²⁵Tsa' loq'ui Mefiboset ti Jerusalén cha'an mi' tilel i taj jini rey. David tsi' sube: ¿Chucoch ma'anic tsajniyet quic'ot, Mefiboset? che'en. ²⁶Mefiboset tsi' jac' λ : Ma'anic tsa' mejliyon c rey, come c winic tsi' lotiyon. Tsac sube cha'an mi' chajpabeñon juncojt burro, cha'an mic majlel ba'an c rey, come mach mejlicon ti xambal. ²⁷Tsi' wulwul a'leyon ti a tojlel, c yum. Pero cujil lajalet c rey bajche' juntiquil i yángel Dios. Jini cha'an yom ma' mel che' bajche' a wom. ²⁸Come machic tsa' p'untayon lojon che' ba tsa' chami c tat laj chameñonix lojon, pero ma'anic tsa' wac'ayon lojon ti chamel. Tsa' p'ayayon cha'an mic ten cha'len we'el a wic'ot ti a mesa. ¿Mach ba cabalic i yutslel a pusic'al? Jasalon, che'en Mefiboset. ²⁹Jini rey tsi' jac'be: ¿Chuqui i ye'tel cabal t'an? che'en. Cujilix bajche' yom melol. Jatet yic'ot Siba mi caj la' t'oxben la' ba jini lum, che'en. ³⁰Mefiboset tsi' sube: La' i laj ch'am Siba, come tijicñayon cha'an tsa' cha' tiliyet ti uts'at ti a yumantel ila ti a wotot, che'en.

³¹Che' ja'el Barzilai jini chumul ba ti Galaad tsa' loq'ui ti Rogelim. Tsa' jubi majlel i taj jini rey. Tsi' pi'le majlel c' λ λ ti Jordán ja'. ³²Anix chanc'al i jabilel Barzilai. Jiñach tsa' ba i laj aq'ue chuqui yom jini rey che' ya'an ti Mahanaim, come wen chumul jini winic. ³³Jini rey tsi' sube Barzilai: La' c'axiconla. Mux caj cantañet ti cotot ti Jerusalén, che'en. ³⁴Pero Barzilai tsi' sube: Wen ñoxonix. Mach jalix mi caj c chamel. Mach mejlonix ti majlel a wic'ot ti Jerusalén. ³⁵Come anix chanc'al c jabilel. Mach mejlix j can chuqui tac uts'at yic'ot jini mach ba uts'atic. Mach mejlic cubin i sumucler chuqui mij c'ux,

yic'ot chuqui mic jap. Mach mejlix cubiben i c'ay jini xc'ayob. ¿Chucoch mic to'o aq'uen i ye'tel c rey? ³⁶Mu' to c ts'ita' xΛn majlel jini bij ya' ti junwejl Jordán ja' cha'an mij cΛyet. Mach yomic mic ch'Λm c chobejtΛbal ti a tojlel. ³⁷A wocolic la' cha' sujticon ti cotot tic tejclum ya' ba' muculob c tat yic'ot c ña'. Ya'ix mic mujquel ja'el. Pero wΛ'an jini calobil Quimam. PΛyΛ a wic'ot. Yom ma' melben bajche' jach a wom cha'an mi' taj i c'Λjñibal. Che' tsi' yΛΛΛ Barzilai. ³⁸Jini rey tsi' yΛΛΛ: Yom cu mic pΛy majlel quic'ot. Mi caj j cosan ti uts'at che' bajche' a wom. Pejtelel chuqui ma' c'ajtibañon mi caj c mel, che'en David.

³⁹Tsa' laj c'axiyob winicob ti Jordán ja'. Che' bΛ c'axemix ja'el jini rey, tsi' ts'ujts'u Barzilai. Che' jini tsi' choco sujtet ti' yotot yic'ot i yutslel i t'an. ⁴⁰Jini rey tsa' majli ti Gilgal. Quimam tsi' pi'le majlel. Ti pejtelel i winicob Judá yic'ot lamital i winicob Israel tsi' pi'leyob majlel.

⁴¹Tsa' caji' tilel jini yambΛ ojliil israelob ba'an David. Tsi' yΛΛayob: ¿Chucoch ñuc woli' pΛsob i bΛ ti a tojlel jini winicob ti Judá? Tsajni i pΛyetob tilel yic'ot a pi'Λlob, yic'ot a waj e'telob cha'an mi' yotsañob i bΛ ti ñuc ti a wut, che'ob.

⁴²Pejtelel i winicob Judá tsi' jac'beyob israelob: ¿Mach ba yomic mic pΛy lojon tilel? ¿Mach ba i pi'Λlonic lojon jini rey? ¿Chuqui i ye'tel mi la' cha'len mich' bajche' jini? ¿Tsa' ba j c'uxbe lojon i chubΛ'an jini rey? ¿Am ba chuqui tsac ch'Λmbe lojon? che'ob. ⁴³Jini israelob tsa' caji i ya'leñob: Joñon lojon lujunmojtton lojon. Jatet junmojtet jach la. Jini cha'an yom mij q'uejlel lojon ti ñuc ti tojlel David, pero tsa' la ñusayon. ¿Chucoch ma'anic tsa' p'isiyon lojon ti wenta? Joñon lojon ñaxan tsa' caji c cha' pΛy lojon tilel jini rey ti' yotot, che'ob. Mich'atax tsi' jac'ayob jini chumulo' bΛ ti Judá. Tsi' cΛΛΛx cha'leyob a'leya.

Tsi' chan'esa i bΛ Seba

20 Ti jim bΛ ora ya'an juntiquil ch'aplón bΛ winic i c'aba' Seba (i yalobil Bicri). Jiñach benjamín. Tsi' wusu trompeta. Tsi' subeyob israelob: Ma'anic chuqui mi caj la cΛq'uentel ti' tojlel David (i yalobil Isai). Jini cha'an conla ti sujtet ti la cotot, che'en Seba. ²Jini israelob tsa' caji i laj cΛyob David cha'an mi' tsacleñob Seba. Pero jini chumulo'

ba ti Judá tsi' chaⁿ tsacleyob David. Tsi' pi'leyob ti xambal c'lalal ti Jordán ja', c'lalal tsa' c'otiyob ti Jerusalén. ³Che' ba tsa' c'oti David ti Jerusalén, tsi' paya tilel jini lujuntiquil i yixicob tsa' ba i c'ayayob ti can otot. Tsi' yac'ayob ti cantantel. Tsi' yalq'ueyob chuqui tac yom, pero ma'anix tsi' chaⁿ pi'leyob. Che' jax joy ñup'ulob ti pejtelel q'uin tsa' ajniyob che' bajche' xmeba'ob jinto tsa' chamiyob.

⁴Jini rey tsi' sube Amasa: Yom ma' tempan tilel pejtelel jini soldadojob ti Judá. Ila ti uxp'ejl q'uin yom laj wa' añob a wic'ot, che'en. ⁵Jini cha'an tsa' majli Amasa cha'an mi' tempañob tilel, pero tsa' jal'a. Ma'anic tsa' tiliyob che' ti' yorajlel. ⁶Jini cha'an David tsi' sube Abisai: Jini Seba i yalobil Bicri muq'uix cajel i ñumen p'ol lac wocol che' bajche' Absalón. Ti ora yom ma' pay majlel jini xcantayajob c cha'an, cha'an mi la' wajñesan Seba ame ochic ti ts'ajquibil ba tejclum tac ba' mi caj i coltan i ba, che'en David. ⁷Abisai yic'ot Joab tsa' majliyob ti ajñel yic'ot jini yajcabilo' ba xcantayajob i cha'año' ba Joab, yic'ot pejtel jini ch'ejlo' ba winicob i cha'año' ba David. Tsa' loq'uuyob ti Jerusalén cha'an mi' chucob Seba (i yalobil Bicri). ⁸Che' c'otemobix ya' ba'an colem xajlel ti Gabaón, tsa' c'oti ja'el Amasa. Jini Joab lapbil i cha'an i bujc soldado, calchbil ala machit ya' ti' pat. Che' ba tsa' majli i yalq'uen cortesía Amasa, Joab tsi' loc'sa jini machit ti' yotot. ⁹⁻¹⁰Joab tsi' sube: ¿Uts'at ba añet? che'en. Joab tsi' ñewbe majlel i tsucti' Amasa ti' tojel i ñoj cha'an mi' ts'ujts'un. Pero Amasa ma'anic tsi' tsaji i ba. Ma'anic tsi' q'uele jini ala machit chucbil ba i cha'an Joab ti ts'ej ba i c'ab. Joab tsi' jeq'ue ti' ñac'. Tsa' caji ti loq'uel i soyta'. Tsa' ñol yajli ya' ti lum. Chamen tsa' junyajlel cale. Joab yic'ot Abisai i yijts'in tsa' majliyob cha'an mi' saclañob Seba.

¹¹Joab tsi' sube wa'tal juntiquil i winic ba'an ch'ujlelal. Jini winic tsi' cha'le oñel: Majqui jach mi' c'uxbin David la' ñumic majlel yic'ot Joab, che'en. ¹²Awilan ya' ñolol Amasa ti' yojlil bij, wen pajq'uem ti' ch'ich'el. Pejtelel xñumelob ya jach tsa' wa'leyob. I winic Joab che' ba tsi' q'uele ya jach wa'alob woli' q'uelob jini xchamel, tsi' tats'la ya' ti bij. Tsi' moso ti pisil. ¹³Che' ba loc'sabilix ti bij, tsa' ñumiyob pejtelel jini woli ba i tsacleñob Joab cha'an mi' majlel i chucob Seba (i yalobil Bicri).

¹⁴Pero jini Seba laj ñumenix ti Israel c'Alal ti tejclum i c'aba' Abel am ba ti Betmaaca. Cabal woli' tempan majlel i pi'Allob. ¹⁵Che' ba tsa' c'otiyob i soldadojob Joab ya' ti Abel Betmaaca, tsi' joy mactayob jini tejclum. Tsi' cha'leyob wersa cha'an mi' melob i letsib, cha'an mi' letselob ti' ts'ajquil jini tejclum. ¹⁶Juntiquil x'ixic am ba cabal i ña'tabal ya' ti tejclum c'am tsa' caji ti t'an: La' wocolic payla tilel Joab ilayi cha'an mic cha'len lojon t'an, che'en. ¹⁷Che' lac'Alix yom c'otel Joab ya' ba'an, jini x'ixic tsi' c'ajtibe: ¿Jatet ba jini Joab? che'en. Tsi' jac'Al: Joñon cu, che'en. Jini x'ixic tsa' caji i suben: Ñich'tañon, che'en. Joab tsi' jac'Al: Wolic ñich'tañet, che'en. ¹⁸Jini x'ixic tsi' sube Joab: Ti wajali tsi' yalAyob winicob: “Majqui jach yom i toj'esantel, la' majlic ti Abel”, che'ob. Che' jini tsa' mejli ti toj'esantel, come cabal c ña'tibal lojon. ¹⁹Wa' chumulon lojon ila ti' lumal Israel. Pec'on lojon. Mic wen bac'ñan lojon lac Yum. Pero jatet wolix a ña'tan a jisan jini tejclum mu' ba i cabal coltan Israel. ¿Chuqui i ye'tel mi caj a lon jisañon lojon i cha'añon ba lac Yum? Che' tsi' yalAl jini x'ixic. ²⁰⁻²¹Joab tsi' jac'Al: Ma'anic wolic ña'tan c jisañetla i cha'añet ba la lac Yum. Pero woli jach c saclan lojon juntiquil winic i c'aba' Seba (i yalobil Bicri) ch'oyol ba ti bujtal ya' ti Efraín, come tsa'ix i mele chuqui leco ti' contra jini rey David. Jini cha'an yom mi la' wac' tic wenta lojon. Che' jini muq'uix c cha' sujtet lojon, che'en. Jini x'ixic tsi' sube Joab: Pijtanla ya'i. Muq'uix cajel c wox chocbeñet lojon loq'uel i jol ti' pat jini ts'ajc, che'en. ²²Ti ora tsa' majli jini x'ixic ba'an i pi'Allob. Tsi' pejayob ti uts'at ba i ña'tabal. Che' jini tsi' set' t'objeyob i jol Seba. Tsa' wox chocbenti loq'uel i jol ya' baqui woli' pijtan Joab. Tsi' cha' wusu i trompeta Joab cha'an mi' cAyob i contrajin jini tejclum. Tsa' cha' sujtiyob jini soldadojob ba' chumulob ti jujuntiquil. Joab tsa' majli ti Jerusalén ba'an jini rey.

Jini i yaj e'telob David

(2 S. 8.15-18; 1 Cr. 18.14-17)

²³Joab jiñach ñuc ba yumal ti' tojlel pejtelel soldadojob. Benaía jiñach i yum xcAntayajob i cha'an rey. ²⁴Adoram jiñach am ba ti' wenta cha'an mi' q'uel pejtelel jini xic'bil ba x'e'telob. Josafat (i yalobil Ahilud) jiñach secretario. ²⁵Seva

jiñlach sts'ijbujel. Sadoc yic'ot Abiatar jiñoblach motomajob.
²⁶Ira jini jaireo jiñlach i motomaj David.

Wocol ti' caj gabaoñob

21 Che' woli ti yumantel David, tsa' caji wiñal uxp'ejl jab ya' ti' lumal. David cabal tsi' cajtibe lac Yum chuqui i sujmllel. Awilan, lac Yum tsi' sube cha'an ti' caj i mul Saúl, come jini tsi' bec'beyob i ch'ich'el jini gabaoñob. ²Jini rey tsi' choco ti palyol jini gabaoñob cha'an mi' pejcañob. Awilan mach israelob i jini gabaoñob. Jiñoblach amorreojob. Jini israelob tsi' can wa'chocoyob i t'an ti yamba ora yic'otob, pero Saúl tsi' ñopo i jisañob. Tsi' ña'ta i ñuq'uesan i lumal Israel yic'ot Judá.

³David tsi' subeyob jini gabaoñob: ¿Bajche' mi mejlel ti tojtal i mul Saúl cha'an mi la' c'ajtiben Dios i yutslel i t'an ti' tojlel pejtél Israel? che'en. ⁴Jini gabaoñob tsi' jac'ayob: Ma'anic mij c'ajtin lojon oro mi plata cha'an i q'uexol jini wocol tsa' ba i melbeyon lojon Saúl. Mach comic lojon mi' chamel mi juntiquilel israel, che'ob. David tsi' jac'a: ¿Chuqui la' wom mic melbeñet? Muq'uix c mel, che'en. ⁵⁻⁶Jini gabaoñob tsi' jac'beyob: Saúl tsi' ñopo i jisañon lojon quic'ot c pi'lob lojon. Jini cha'an yom mi la' wlaq'ueñon lojon wuctiquil i yalobilob cha'an mic jich'e lojon ti' tojlel lac Yum ya' ti Gabaa i tejclum Saúl, che'ob. Jini rey tsi' jac'beyob: Muq'uix calq'ueñetla, che'en.

⁷David ma'anic tsi' choco majlel Mefiboset (i yalobil Jonatán i yalobil ba Saúl), cha'an jini t'an tsa' ba i yaq'ue Jonatán ti' tojlel lac Yum. ⁸Pero tsi' palybeyob cha'tiquil i yalobilob Saúl tsa' ba i canta Rizpa (i yalobil Aja), i c'aba'ob Armoni yic'ot Mefiboset. Tsi' palybeyob ja'el jo'tiquil i yalobilob Mical, i yixic'al Saúl. Jini jo'tiquil i yalobiloblach Adriel (i yalobil ba Barzilai chumul ba ti Meholat). ⁹Jini rey tsi' choco majlel jini wuctiquil i yalobilob Saúl ba' añob jini gabaoñob. Tsi' jich'iyob ya' ti bujtal ti' tojlel lac Yum. Che'ach tsa' chamiyob jini wuctiquilob che' ti ñaxan ba q'uin che' mi' tuc'ob cebada.

¹⁰Rizpa (i yalobil Aja) tsi' lich'i jump'ejl coxtal ya' ti' pam xajlel cha'an mi' waytan che' ba tsa' tejchi i tuc' cebada. Ya' tsa' cale jinto tsa' yajli ñaxan ba ja'al. Ma'anic tsi' wis ac'a ti t'uchtal mi' juncojtic te'lemut ya' ti ch'ujlelal tac. Ma'anic

tsi' yac'Λ ti ochel bate'el ti ac'Λlel. ¹¹An majqui tsi' sube David chuqui woli' mel Rizpa. ¹²⁻¹⁴David tsi' yac'Λ i t'an cha'an mi' mujquel i baquel jini winicob ya' ti' t'ejl i mucuñib Cis jini i tat Saúl. Tsi' c'ajtibeyob jini winicob ti Jabes Galaad i baquel Saúl yic'ot Jonatán. Come tsa'ix i chilyob jini ch'ujlelal tac ya' ba' joc'chocobilob ti Betsan che' ba tsi' tsansayob jini filisteojob ya' ti Gilboa. Jini winicob ti Jabes Galaad tsi' ch'ambeyob sujtetel i baquel Saúl, yic'ot i baquel Jonatán, yic'ot i baquel pejtelel tsa' ba jich'iyob. Tsi' mucuyob i baquel Saúl yic'ot i baquel Jonatán ti' lumal benjamiñob ti Zela ya' baqui tsa' mujqui i tat i c'aba' Cis. Che'ach tsi' laj meleyob che' bajche' tsi' subeyob jini rey. Che' jini Dios tsa' caji i jac'ben i yoración cha'an mi' cha' ac' i wut jini lum.

Tsi' jisayob jini filisteojob

(1 Cr. 20.4-8)

¹⁵Jini filisteojob tsa' cha' cajiob ti guerra yic'ot israelob. Jini cha'an David tsa' majli ti guerra yic'ot i soldadojob, pero ti jim ba ora David tsa' lujb'a. ¹⁶Juntiquil colem ba filisteo i c'aba' Isbibenob chucbil ba i lanza am ba i yalel jo'p'ejl kilo bronce, ts'ita' coel i tsansan David. ¹⁷Pero ti jim ba ora Abisai (i yalobil Sarvia) tsa' c'oti i coltan David. Tsi' tsansa jini filisteo. Jini cha'an jini winicob tsa' caji i subeñob David: Mach yomix ma' chan loq'uel ti guerra ti pejtelel ora ame a wac' ti jisantel i ñuclel israelob, che'ob.

¹⁸Mach jalic tsa' cha' ujti guerra ti' contra jini filisteojob ya' ti Gob. Sibecai jini husat tsi' tsansa Saf, juntiquil wen colem ba winic. ¹⁹Che' ba tsa' cha' ujti guerra ya' ti Gob ti' contra jini israelob, jini Elhanán (i yalobil Jaare Oregim ch'oyol ba ti Belén) tsi' tsansa Goliat jini geteo, chucbil ba i cha'an wen colem ba lanza. Che'ach bontal i c'ab lanza bajche' te' mu' ba i c'añob ti jalbal. ²⁰⁻²¹Che' ba tsa' cha' ujti yamba guerra ya' ti Gat, ya'an juntiquil winic wen chan ba, am ba wacts'ijt i yal i c'ab ti jujunts'ijt i c'ab, yic'ot wacts'ijt i yal i yoc ti jujunwejl. Ili winic tsi' techbe i mich'ajel israelob. Pero Jonatán (i yalobil i yeran David, i c'aba' Simea) tsi' tsansa jini colem winic. ²²Ili chancticlelob ya' lu' ch'oyolob ba'an colem winicob ya' ti Gat. Pejtetel ili winicob tsa' yajliyob ti' c'ab i winicob David.

I c'ay David

(Sal. 18)

22 Jiñlach i c'ay David tsa' ba i c'ayibe lac Yum che' ti jini q'uin che' ba lac Yum tsi' colta loq'uel ti' p'atlelel pejtelel i contrajob yic'ot ti' p'atlelel Saúl:

² Lajalach lac Yum bajche' ch'entun ba' mi lac puts'el.

Jiñlach cotot ts'ajquibil ba yilal. Jiñlach caj coltaya.

³ Lajal Dios bajche' wen xuc'ul ba xajlel baqui mic majlel ti puts'el.

Jiñlach c mactajib, jini p'atlel ba mu' ba i coltañon.

Lajalach lac Yum bajche' chan ba ts'ajc ba' mi cochel.

Jiñlach xcoltaya c cha'an mu' ba i coltañon loq'uel ti' p'atlelel jini jontolo' ba.

⁴ Mic pejcan lac Yum cha'an uts'at.

Coltabilonix ti' tojlel j contrajob.

⁵ Che' colel c chamel tsa' ochiyon ti ja' yilal.

Yom i jisañon jini c'ax babaq'uen ba che' bajche' colem ja'.

⁶ Che' colel c chamel tsa' can chujquiyon yilal.

Jini yom ba i chucon ti' p'atlelel tsi' tajayon.

⁷ Che' añon ti wocol tsac pejca c Yum.

Tsac cha'le oñel ti' tojlel Dios.

Tsi' yubibeyon c t'an ya' ti' Templo.

Tsa' c'oti coñel ya' ba'an Dios.

⁸ Tsi' nijca i ba jini lum, tsa' tili i yujquel lum.

Ba' buchul jini panchan tsa' bujchi.

Tsi' nijca i ba cha'an i mich'ajel Dios.

⁹ Wusiña i ni' Dios yilal cha'an i mich'ajel,

Che' bajche' c'ajc woli ba ti lejmel tsa' loq'ui ti yej yilal.

Tsi' tsuc'u xutunte'.

¹⁰ Lac Yum tsi' ju'sa tilel total, tsi' p'asa i p'atlelel.

Wen i'ic' ya' ti' yebal i yoc.

¹¹ Tsa' wejli tilel yic'ot querubín,

Tsa' wejli tilel ti ic'.

¹² Joyol lac Yum ba' wen pim total.

Wen i'ic' jax, wen pim jini total cuchul ba i cha'an ja'al.

¹³ Jini i c'ac'al i wut lac Yum mi' tsuc' c'ajc ti' tojlel.

- 14 Lac Yum tsi' yac'Λ i t'an chajc ti panchan,
Jini c'ax ñuc bΛ tsi' yac'Λ i t'an.
- 15 Tsi' choco tac tilel chajc,
Tsi' yajñesa i contrajob David.
- 16 Che' jini tsa' tsictiyi i bijlel tac ja', tsa' tsictiyi i buchlib tac
wits.
Che' bΛ tsi' cha'le tic'oñel lac Yum, wusiña jax i ni' yilal.
- 17 Tsa' loq'ui lac Yum ti panchan,
Tsi' chucuyon, tsi' loc'oyon ti colem ja'.
- 18 Tsi' chucuyon loq'uel ti' p'Λtlal j contra,
Ti' tojlelob mu' bΛ i ts'a'leñoñob.
Ñumen i p'Λtlal j contrajob bajche' c p'Λtlal.
- 19 Tsa' tiliyob i contrajiñon ti' yorajlel c wocol,
Pero tsi' xuc'chocoyon lac Yum.
- 20 Tsi' yac'Λyon ti coel cha'an mi cajñel ti xuc'ul.
Tsi' pΛyΛyon loq'uel ti wocol,
Come c'ux mi' yubiñon.
- 21 Lac Yum tsi' yΛq'ueyon c chobejtΛbal cha'an tojon.
Cha'an toj c melbal, jini cha'an tsi' yΛq'ueyon c chobejtΛbal.
- 22 Come tsa'ix c tsajcabe majlel i bijlel lac Yum.
Ma'anic tsac cha'le mulil, ma'anic tsaj cΛyΛ Dios.
- 23 Tsa'ix cac'Λ tic'pusic'al pejtelel i meloñel.
Ma'anic tsac chocbe ts'ijbubil bΛ i mandar.
- 24 Tsa' ajniyon ti toj ti' tojlel lac Yum.
Tsaj cΛnta c bΛ cha'an ma'anic mic cha'len mulil.
- 25 Jini cha'an lac Yum tsi' yΛq'ueyon c chobejtΛbal cha'an
tojon,
Cha'an toj c melbal ti' wut Dios.
- 26 Ma' pasben a wutslel jini winic uts'at bΛ i pusic'al,
Ma' pasben i xuc'tilel a pusic'al jini xuc'ul bΛ i pusic'al.
- 27 Jini sac bΛ mi caj i ña'tan sΛquet,
Pero mich' ma' pasben a bΛ jini jontol bΛ.
- 28 Ma' coltan jini tic'Λbilo' bΛ,
Ma' peq'uesan jini chan bΛ mi' lon mel i bΛ.
- 29 C Yum Dios, ma' wΛq'ueñon j c'Λc'al che' añon ti ic'ch'ipan
bΛ pañimil.

- 30 Cha'an ti a p'atɬalel mi' majlel c cha'an, anquese cabal j
 contrajob.
 Cha'an ti jatet c Dios mi mejlel c tijp'el ñumel ti junwejl i
 ts'ajquil j contrajob.
- 31 Ts'acɬalɬach chuqui mi' mel Dios,
 Isujmach i t'an lac Yum.
 I maɬɬajibach pejtél mu' ba i yac'ob i ba ti' wenta.
- 32 ¿Majqui Dios? ¿Mach ba jinic lac Yum? Jincuyi.
 ¿Am ba yamba xuc'ul ba bajche' Dios? Ma'anic.
- 33 Jiñach Dios mu' ba i yalq'ueñon c p'atɬalel.
 Mi' toj'esán majlel jini xuc'ul ba i pusic'al yic'ot lac Yum.
- 34 Sejb mi' mel coc che' bajche' i yoc me'.
 Dios mi' cantañon ba' babɬq'uen mic yajlel.
- 35 Mi' cantesañon cha'an ch'ejl mic cha'len guerra,
 Mi' yalq'ueñon c sats' p'atɬal ba jalɬjb.
- 36 Jatet tsa'ix a walq'ueyon j colɬantel i wenta c maɬɬajib.
 Ma' ñuq'uesañon ti' yutslel a pusic'al.
- 37 Tsa' chajpɬbeyon i yajñib coc.
 Tsa' p'atésa coc.
- 38 Tsa cajñesa j contrajob, tsac tajayob.
 Jinto tsac laj jisayob tsa' sujtiyon.
- 39 Tsac lowoyob, ma'anic tsa' chan mejliyob ti tejchel.
 Tsa' yajliyob ti' t'ejl coc.
- 40 Tsa'ix a walq'ueyon c p'atɬalel cha'an guerra.
 Tsa' jats'ɬ jini tsa' ba tejchiyob tij contra.
- 41 Jatet tsa' bac'tesa j contrajob jinto tsa' puts'iyob majlel.
 Tsac jisa jini mu' ba i ts'a'leñoñob.
- 42 Tsi' lon cha'leyob oñel. Ma'anic majch tsi' coltayob.
 Tsi' pejcayob lac Yum, pero ma'anic tsi' jac'beyob.
- 43 Tsac bic'tesa j contrajob che' bajche' ts'ubejn mu' ba i
 wujtan letsel ic'.
 Tsac t'uchtayob che' bajche' i bibi'lel calle.
- 44 Tsa'ix a coltayon loq'uel ti' tojlel jini winicob woliyo' ba ti
 leto.
 Tsa'ix a wotsayon ti yumal ti' tojlel jujumpejt colem
 tejclum.

Winicob x'ixicob mach ba j cañayobic ti yamba ora wolix i melbeñoñob que'tel.

⁴⁵ Che' mi' yubibeñoñob c t'an, mi caj i jac'beñoñob.

Jini ñajt ba ch'oyolob mi caj i yumañoñob.

⁴⁶ Jini ñajt ba ch'oyolob tsi' cha'leyob baq'uen.

Tsiltsilña tsa' loq'uiyob ba' maclob.

⁴⁷ Cuxul lac Yum. Wocolix i yala come jiñach xuc'ul ba Xajlel.

La' sujbic i ñuclel Dios mu' ba i coltañon.

⁴⁸ Diosach mu' ba i quextabeñoñob i mul j contrajob,

Jiñach mu' ba i jultesabeñoñob i pusic'al winicob x'ixicob cha'an mi' jac'beñoñob.

⁴⁹ Jatet ma' coltañon loq'uel ti' p'atlel j contrajob.

Melel ma' chan'esañon ti' tojlel jini mu' ba i tejchelob tij contra.

Tsa' palyon loq'uel ti' p'atlel jini jontolo' ba.

⁵⁰ Jini cha'an, c Yum, mux c sub a ñuclel ya' ti jujumpejt

colem tejclum tac.

Mi caj j c'ayibeñet a c'aba'.

⁵¹ Cha'an ti jatet mi' majlel i cha'an jini tsa' ba a wa'choco ti rey.

Ma' pasben a wutslel jini yajcabil ba a cha'an,

Jiñach David yic'ot i p'olbal ti pejtelel ora.

Jini cojix ba i t'an David

23 Jiñach cojix ba i t'an David:

Jiñach i t'an David (i yalobil Isaf), jini winic tsa' ba wa'choconti ti ñuc ba i ye'tel.

Jini yajcabil ba cha'an i Dios Jacob, jini wen yujil ba c'ay ti' tojlel israelob.

² Jini Ch'ujul ba i Ch'ujlel lac Yum tsa'ix i cha'le t'an tic tojlel.

Anix i t'an ti quej.

³ Jini i Dios Israel tsa'ix i yala jini t'an.

Jini xuc'ul ba ti' tojlel israelob tsa'ix i pejcayon:

“Jini mu' ba i cha'len yumal ti toj mi caj i ch'am i ye'tel ti' tojlel winicob.

An i yumantel come mi' bɔc'ñan Dios.

⁴ Mi caj i tilel che' bajche' i saclel pañimil che' ti sac'ajel,
Che' mi' loq'uel q'uin che' ma'anic total,
Che' mi' pasel jam ti lum che' ñumenix ja'al", che'en.

⁵ Melelach, xuc'chocobilach cotot ti Dios,
Come tsa'ix i mele pacto quic'ot ti pejtelel ora.

Tsa'ix ña'tanti. Tsa'ix ochi i sellojlel.

Jiñach mu' ba i coltañon.

Jiñach mu' ba i yalq'ueñon c wenel.

⁶ Pero jini xjontolilob mi caj i chojquelob che' bajche' ch'ix.

Ma'anic majqui mi' lot.

⁷ Che' an majqui yom i chuc ch'ix, muq'ui x i c'an tsucul
taq'uin o mi yamba e'tijibal.

Mi caj i laj pulelob ti c'ajc ya' ba' chumulob.

Che' tsi' yala David.

Jini ch'ejl ba i winicob David

(1 Cr. 11.10-47)

⁸ Jiñach i c'aba'ob jini ch'ejl ba winicob tsa' ba i pi'leyob ti guerra David: Joseb Basebet jini tacmon, jini ñuc ba i ye'tel ti' tojlel i yumob soldadojob. An i cha'p'ejlel i c'aba' Adino jini ezne. Tsi' tsansa cha'bajc' winicob ti junyajl jach, ⁹yic'ot ja'el Eleazar (i yalobil Dodo, i butz Ahohi), yic'ot Sama, jiñobach uxtiquil ch'ejl ba i winicob David. Che' ba tsa' puts'iyob jini israelob, David yic'ot ili uxtiquilob tsi' bajñel contrajiyob jini filisteojob. ¹⁰Ti jini jach ba ora Eleazar tsi' chan tsansa filisteojob jinto che' moch'ol jax tsa' c'ale i c'ab ya' ti' yoc i machit. Lac Yum tsi' wen colta. Tsa' cha' sujtiyob tilel pejtelel yaño' ba soldadojob, pero cha'an jach mi' chilbeño i chub'an jini filisteojob tsa' ba tsansantiyob. ¹¹⁻¹²Yamba ch'ejl ba winic i cha'an David jiñach Sama (i yalobil Age, jini arar). Che' ba tsi' techeyob guerra jini filisteojob, jini israelob tsa' laj puts'iyob. Pero jini Sama tsa' wa'le ti' bajñelil ti pac'ab ba'an lentejas. Tsi' lowo cabal filisteojob. Lac Yum tsi' colta cha'an mi' majlel i cha'an.

¹³Año lujuntiquil i cha'c'al jini ñuco' ba i ye'tel. Che' ti' yorajlel c'ajbal tsa' tiliyob uxtiquil ba'an David ya' ti ch'en i c'aba' Adulam am ba ti joctal i c'aba' Refaim. ¹⁴Ti jim ba q'uin ya'an David ti ch'en ba' mach mejlic i tajib i contrajob,

come jini filisteojob tsi' ch'ΛmΛyob jini tejclum Belén. ¹⁵David tsi' yΛΛΛ: Tijicñayon aniquix to bajche' mic taj c cha' jap ja' am bΛ ti pozo ti Belén, che'en. ¹⁶Jini uxtiquil wen ch'ejlo' bΛ tsa' wersa ñumiyob ya' ba' añob filisteojob. Tsa' ochiyob ti tejclum cha'an mi' luchob jini ja' am bΛ ti' tojle i ti' Belén. Tsi' ch'Λmbeyob tilel David, pero ma'anic tsi' jac'Λ i jap. Tsi' beq'ue che' bajche' i wentajlel i majtan lac Yum. ¹⁷David tsi' yΛΛΛ: C Yum, mach mejlic c jap ili ja'. ¿Mu' ba mejlel c japbeñob i ch'ich'el jini winicob tsajniyo' bΛ ba' bΛbΛq'uen mi' chΛmelob? che'en. Jini cha'an ma'anic tsi' japΛ David. Che'Λch tsi' cha'leyob ili uxtiquil ch'ejl bΛ winicob.

¹⁸Abisai i yeran Joab (i yalobil Sarvia), jiñach ñuc bΛ yumΛ ti' tojlel jini lujuntiquil i ch'ac'al. Tsi' tsΛnsa jo'lujunc'al (300) i contrajob ti junyajlel. Ñuc tsa' q'uejli yic'ot jini uxtiquil ch'ejlo' bΛ. ¹⁹Jini cha'an tsa' aq'uenti i ye'tel ti' tojlel jini lujuntiquil i cha'c'al, pero ma'anic tsi' taja i ñuclel jini uxtiquilob.

²⁰Jini Benaía (i yalobil Joiada), jiñach wen ch'ejl bΛ winic ja'el. Ch'oyol ti Cabseel. Tsi' tsΛnsa jini cha'tiquil wen p'Λtalo' bΛ (i yalobilo' bΛ Adriel am bΛ ti Moab). Tsi' tsΛnsa ja'el juncojt bajlum am bΛ ti ch'en che' bΛ tsa' yajli i ña'al tsañal. ²¹Tsi' tsΛnsa ja'el juntiquil soldado ch'oyol bΛ ti Egipto. Ti jim bΛ q'uin chucbil i cha'an i lanza ti' c'Λb jini egipto, pero Benaía cojach tsi' ch'ΛmΛ majlel i te' ti' c'Λb. Tsa' mejli i chilben i lanza. Tsi' c'ΛñΛ i wΛΛc tsΛnsan jini winic ch'oyol bΛ ti Egipto. ²²⁻²³Che'Λch tsi' mele Benaía (i yalobil Joiada). Jini cha'an ñumen ñuc tsa' caji ti q'uejlel ti' tojlel jini lujuntiquil i cha'c'al, pero ma'anic tsi' taja i ñuclel jini uxtiquilob. Jini cha'an tsa' wa'choconti ti' ye'tel cha'an mi' q'uel jini xcΛntayajob i cha'an David. ²⁴Jini Asael i yeran Joab, i cha'añach jini lujuntiquil i cha'c'al. Yaño' bΛ jiñobach:

Elhanán (i yalobil Dodo) ch'oyol bΛ ti Belén, ²⁵Sama yic'ot Elica ch'oyolo' bΛ ti Harod, ²⁶Heles ch'oyol bΛ ti Palti, yic'ot Ira (i yalobil Iques) ch'oyol bΛ ti Tecoa, ²⁷Abiezer ch'oyol bΛ ti Anatot, yic'ot Mebunai ch'oyol bΛ ti Husat, ²⁸Salmón ch'oyol bΛ ti Ahohi, yic'ot Maharai ch'oyol bΛ ti Netofat, ²⁹Heleb (i yalobil Baana) ch'oyol bΛ ti Netofat, yic'ot Itai (i yalobil Ribai) ch'oyol bΛ ti Gabaa am bΛ ti Benjamín, ³⁰Benaía ch'oyol bΛ ti Piratón, yic'ot Hidai ch'oyol bΛ ti ja' am bΛ ti Gaas, ³¹Abialbón ch'oyol bΛ ti Arbat, yic'ot Azmavet

ch'oyol ba ti Bahurim, ³²Eliaba ch'oyol ba ti Saalbón, yic'ot Jonatán (i yalobil Jasén), ³³Sama yic'ot Ahíam (i yalobil Sarar) ch'oyolo' ba ti Arar, ³⁴Elifelet (i yalobil Ahasbai, i yalobil Maaca), yic'ot Eliam (i yalobil Ahitofel) ch'oyolo' ba ti Gilón, ³⁵Hezrai ch'oyol ba ti Carmel, yic'ot Paarai ch'oyol ba ti Arba, ³⁶Igal (i yalobil Natán), ch'oyol ba ti Soba, yic'ot Bani ch'oyol ba ti Gad, ³⁷Selec ch'oyol ba ti Amón, yic'ot Naharai ch'oyol ba ti Beerot, i yaj cañan Joab (i yalobil Sarvia), ³⁸Ira yic'ot Gareb ch'oyolo' ba ti Itra, ³⁹Urías jini heteo. Ti pejtelelob añob wuclujuntiquil i cha'c'al (37).

David tsi' tsiqui winicob

(1 Cr. 21.1-27)

24 Tsa' cha' caji ti mich' lac Yum yic'ot pejtelel israelob. Tsi' ña'ta i yaq'ueñob wocol. Tsi' yotsa ti' pusic'al David cha'an mi' choc ñumel x'e'telob i cha'an, cha'an mi' melob censo ti tejclum tac. ²Jini cha'an jini rey tsi' sube Joab yic'ot jini soldadojob ñuc'o' ba i ye'tel cha'an mi' ñumelob ti pejtelel i lumal Israel c'AlAl ti Dan c'AlAl ti Beerseba, cha'an mi' q'uelob jaytiquilob jini winicob cha'an yom i ña'tan David. ³Joab tsi' jac'be jini rey: La' i p'ojlesan lac Yum Dios i yonlel a winicob ti jo'jo'c'al che' bajche' añonla che' cuxulet to, pero ¿chucoch wersa a wom ili censo? che'en. ⁴Pero tsa' wersa chojqui majlel Joab yic'ot jini ñuc taco' ba i ye'tel cha'an mi' tsicob jini winicob. Tsa' loq'uuiyob ti' tojlel jini rey. ⁵Che' ba tsa' c'axiyob ya' ti Jordán ja', tsa' c'oti i techob i tsicol winicob ya' ti joctal i c'aba' Aroer. Tsa' majliyob ti Gad yic'ot ti Jazer. ⁶Che' ba tsa' ujti ya'i, tsa majliyob ti Galaad yic'ot ti tejclum i c'aba' Hodsi. Tsa' ñumiyob ya' ti Danjaán yic'ot ti' joytAlél Sidón. ⁷Tsa' majliyob ti Tiro jini ts'ajquibil ba tejclum. Tsa' ñumiyob ba'an pejtelel i lumalob jini heveojob yic'ot jini cananeojob. Che' jini tsa' c'otiyob c'AlAl ti Neguev ti Judá c'AlAl ti Beerseba. ⁸Che' ujtemobix ti laj ñumel ya' ti tejclum tac, tsa' cha' sujtiyob ti Jerusalén. Bolomp'ejl uw yic'ot junc'al q'uín tsi' xañayob ti pejtelel jini tejclum tac. ⁹Joab tsa' c'oti i yaq'uen jini rey i juñilel jini winicob tsa' ba chujquiyob ti censo. Ti pejtelel Israel añob cha'bajc' mil (800,000) winicob ch'ejlo' ba cha'an guerra. Jini año' ba ti Judá añob jo'c'al i cha'bajc' mil (500,000) winicob ti pejtelelob.

¹⁰Che' ba tsa'ix ujti i tsicob jini winicob, David tsa' caji' ña'tan i mul. Tsi' sube lac Yum: C Yum tsa'ix c taja c mul ti a tojlel. Leco chuqui tsac mele. Ti wocol t'an mij c'ajtibeñet cha'an ma' ñusaBeñon c mul, come tsa'ix c lon ñusa a t'an, che'en. ¹¹Che' ba tejchemix ch'ojoyel ti wáyel David che' ti sac'ajel, tsa' tili i t'an lac Yum ba'an jini x'alt'an Gad, jini am ba i ña'tabal ti' tojlel David. Tsa' subenti: ¹²Cucu suben David: "Che'ach woli' ya! lac Yum: An uxchajp jini wocol woli ba cac'. Wersa mi caj a yajcan junchajp cha'an mic chocbeñet tilel", che'en. ¹³Jini cha'an Gad tsa' tili ba'an David cha'an mi' suben jini t'an. Tsi' sube: ¿A wom ba mi' tilel wi'ñal wucp'ejl jab ila ti lac lumal? ¿A wom ba puts'el uxp'ejl uw ti' tojlel a contrajob mu' ba i contrajiñetob? ¿A wom ba mi' yujtel chamel uxp'ejl q'uin ti lac lumal? Yom ma' wen ña'tan bajche' yom, cha'an mic cha' suben lac Yum tsa' ba i chocoyon tilel, che'en Gad. ¹⁴David tsi' jac'be Gad: Wen cabal jax wolic mel c pusic'al. La' i yaq'ueñonla wocol lac Yum come cabalach i c'uxbiya. Pero mach yomic mic yajlel ti' p'atalel j contrajob, che'en.

¹⁵Che' jini lac Yum tsi' choco tilel c'amajel tsa' ba i tsansa israelob. Tsa' tejchi ti sac'ajel. Tsa' jal'a uxp'ejl q'uin. Tsa' chamiyob lujump'ejl i chanc'al mil (70,000) winicob ti Dan c'lalal ti Beerseba. ¹⁶Che' ba tsi' chajpa i ba jini ángel cha'an mi' jisan jini año' ba ti Jerusalén, lac Yum tsi' cha' mele i pusic'al. Tsi' sube jini ángel: Jasalix wale. Cayax a jisan jini winicob, che'en. Awilan ya'ix wa'al jini ángel i cha'an lac Yum ti patio ba' mi' jajts'el trigo. Jini patio i cha'añach Arauna jini jebuseo. ¹⁷David tsi' q'uele jini ángel. Tsi' sube lac Yum: Tsac cha'le mulil joñon, pero ili tiñame'ob, ¿chuqui tsi' meleyob? Yom ma' jisañon quic'ot c pi'alob, che'en David.

¹⁸Gad tsa' tili ba'an David ti jini jach ba q'uin cha'an mi' suben: Yom ma' majlel cha'an ma' ts'alben letsel i pulantib lac Yum ya' ti patio i cha'an ba Arauna jini jebuseo, ya' ba' mi' jajts'el trigo, che'en. ¹⁹Jini cha'an tsa' majli David cha'an mi' mele' che' bajche' tsi' sube lac Yum. ²⁰Che' ba tsi' q'uele Arauna, ya'ix woli' tilel jini rey yic'ot pejtelel jini x'e'telob i cha'an, tsa' tili i tajob. Tsi' pacchoco i ba ti lum ti' tojel jini rey. ²¹Arauna tsi' sube jini rey: ¿Chucoch tsa' tiliyet? che'en. David tsi' jac'be: Tsa' tili c man a patio ba' ma' jats' jini trigo cha'an com c melben lac Yum jump'ejl pulantib, cha'an mi' lajmel

jini c'amajel woli' bɔ i tsansan winicob, che'en. ²²Arauna tsi' sube David: Yom ma' c'an pejtelel chuqui tac a wom am bɔ tic wenta. Wɔ'an wacax cha'an mi' pulel, yic'ot ja'el jini te' am bɔ i c'ajñibal cha'an mic jats' trigo yic'ot cha'an mic top' lum. Yom ma' lu' ch'am cha'an i si'il jini majtañal, che'en. ²³Muq'uix cɔq'ueñet pejtelel iliyi. La' i q'uel jini majtañal ti uts'at lac Yum Dios, che'en. ²⁴Pero jini rey tsi' sube Arauna: Ma'anic mic ch'am ti che jach che' bajche' c majtan. Muq'uix c tojbeñet, come mach comic c pulben i majtan lac Yum Dios mach bɔ anic i tojol, che'en. Jini cha'an David tsi' tojo jini patio yic'ot jini tat wacax. Tsi' tojo lujump'ejl i yuxc'al (50) plata. ²⁵Che' jini David tsi' wa'chocobe i pulantib lac Yum. Tsi' pulbe i majtan tac lac Yum. Tsi' yɔq'ue majtañal ja'el cha'an mi' yuts'esɔben i pusic'al. Che' jini tsa' lajmi jini c'amajel woli' bɔ i tsansañob.